

四庫全書

子部

欽定四庫全書

子部  
圖書編卷十四

詳校官中書臣孫衡

主事臣祁韻士覆勘

總校官進士臣朱鈐

校對官編修臣于鼎

謄錄監生臣羅應台

欽定四庫全書

圖書編卷十四

明 章潢 撰

學論語叙

論語二十篇雜記聖門師弟子問答語何博哉談聖  
學者有云一貫爾已似無以博為也然孔子嘗欲無  
言因賜疑何述乃曰天何言哉四時行焉百物生焉  
是聲臭俱無而時行物生此天之所以於穆不已也

不厭不倦而無行不與此孔子所以無隱也與言終日而無言不悅此回之所以如愚也如此則知隨其問仁問知問政問孝而語之孰非因材而篤之意哉苟不能于並育並行窺其敦化川流之蘊而止求一於於穆之微其何以識天何以識孔子也噫時刻皆天行也纖物皆天生也一作止語默皆聖德之著也雖謂論語二十篇一以貫之可矣合二十篇而蔽以一言曰學而時習之亦可矣若夫發憤竭才下學上

達則存乎其人



論語二十篇

學而第一 先進第十一 何氏曰魯論語二

為政第二 顏淵第十二 十篇齊論語別有

八佾第三 子路第十三 問王知道凡二十

里仁第四 憲問第十四 二篇其二十篇中

公治長<sup>第五</sup> 衛靈公第十五 章句頗多於魯論

雍也第六 季氏第十六 古論出孔氏壁中

述而第七 陽貨第十七 分堯曰下章子張

泰伯第八 微子第十八 問政以為一篇篇

子罕第九 子張第十九 不與齊魯語同

鄉黨第十 堯曰第二十

程子曰論語之書成於有子曾子之門故其書獨二  
子以子稱

程子曰讀論語有讀了全無事者有讀了後其中得  
一兩句喜者有讀了後知好之者有讀了後直有不  
知手之舞之足之蹈之者

程子曰今人不會讀書如讀論語未讀時是此等人



讀了後又只是此等人便是不曾讀

程子曰頗自十七八讀論語當時已曉文義之美愈久但覺意味深長

嘗讀魯論而求吾孔氏之所以為學者矣蓋夫孔氏之教其徒也一則曰仁二則曰仁當時學者之學於孔氏也一則曰求仁二則曰求仁是故立而立人達而達人者語其體一克己復禮主敬行恕參前而倚衡者語其方也博學審問慎思明辯篤行者語其功

也一貫者語其約也天下歸仁者語其大也擇善者  
擇乎此也固執者固執乎此也造次於是顛沛於是  
者語其不息乎此也會子之一日三省志乎此而省  
也子路之樂與物共志乎此而共也顏子之無伐善  
施勞志乎此而無伐施也嗚呼聖門之相授受者如  
此然則聖人之學其至易而至簡者果在是耶抑不  
在是耶故夫子嘗曰仁遠乎哉我欲仁斯仁至矣又  
曰苟志於仁矣無惡也今之為聖人者其果求諸聖

人矣乎

孔子以一人纘緒于聖立極萬世豈有他術哉惟其學焉而已矣一則曰我學不厭一則曰下學上達而且以好學自許也所以論語二十篇首揭學而時習一語以開萬世作聖之蒙而學之一字得非孔門之至要者哉試由論語以求孔子蓋自十五以至七十從心不踰矩雖以仰鑽瞻忽之回尚欲從末由而究其所以惟發憤忘食樂以忘憂不知老之將至於以

滿其志學之分量云耳然其學也果多學而識之歟  
一以貫之仁而已矣即大學所謂明明德親民止至  
善是也今之頌大成贊天縱者咸謂其祖述憲章上  
律下襲問官問禮好古敏求夫子焉不學也孰知孔  
子不以忠信自足不以生知自居惟躬行未得以自  
歉德不修學不講以為憂每云我未能焉何有於我  
所以亹亹然終日不食終夜不寢而不敢不勉惟時  
習此學焉已矣古今之勤學孰有如孔子者哉然已

欲立而立人已欲達而達人老者安朋友信少者懷  
乃其仁愛天下之心也終身汲汲皇皇欲滿其志學  
之分量者滿此欲立欲達老安少懷之心也使得邦  
家而理之朞月而可三年有成綏來動和之化可以  
計歲月而責成效矣奈何鳳鳥不至河圖不出天下  
莫我知也雖問津轍環若求亡子於道路而畏於匡  
要於宋絕糧於陳蔡至叔孫毀於朝微生譏其佞而  
楚狂接輿且有鳳哀之嘆矣斯時也若可以已也猶

然南子可以見陽貨可與言公山弗擾與佛肸召可  
以往此其心豈徒以至堅至白者在我欲自試於磨  
涅而不為匏瓜繫焉者哉鳥獸不可與同群吾非斯  
人之徒與而誰與故仕以行義欲以有道易無道者  
自不容已也知其不可而為之雖晨門亦諒其心矣  
但仁愛天下之心固無窮也然衛靈齊景季桓子一  
有不合明日遂行仕止久速則惟其時而已矣所以  
用行舍藏我無所與疏食水飲樂在其中凡陋巷之

回舞雩之點皆可與共此學也故在陳之歎惟屬於  
吾黨之小子觀其進互鄉戒闕黨孺悲有教無類孰  
非仁愛斯人之心乎雖然孔子果因道既不行然後  
有四教之陳四科之設乎蓋諸賢相從未嘗一日離  
也車不停驟固欲行義以達道而聯屬天下之英才  
以大明此學啟憤發排實未嘗一日廢是以閭閻侃  
侃樂於洙泗之濱不特四勿一貫各得其心學之傳  
也隨羣弟子問仁問孝問政莫不因才造就而被之

以時雨之化此其立達之心雖不能盡遂而心學一  
脉亦賴諸賢以傳之於無窮文未喪天道不墜地萬  
世其永賴矣可見堯舜禹湯文武以是學而作之君  
臯陶益稷伊傅周召以是學而作之相孔子以是學  
而作之師而春秋以下凡為君為相者得其學則治  
失其學則亂孔子以匹夫而師萬世者非學而何哉  
要之仁一也學在斯教即在于斯也夫子不可及固  
猶天不可階而升然四時行百物生莫非天也天雖



不言而即時與物以觀天斯可以默識其於穆不已之蘊學不厭教不倦夫子一天也夫子雖不可及而即學與教以求夫子亦可以默識其與天並運之心後人特患無作聖之志耳有能一日用其力于仁矣乎我未見力不足者况魯論所記載其無行不與循循善誘其在也否則人人讀此論語程子謂讀了後又只是此等人便是不曾讀反觀寧無愧哉

論語大旨

問子謂學習為論語二十篇要旨信然矣謂學不盡  
于一字之訓釋何歟曰讀論語且不必證他經書即  
二十篇中反覆紬繹亦見非一字可訓何也學之為  
言效也皆是也未足以盡其義也孔子自十五志學  
觀其終身進步而立不惑知天命耳順不踰矩何一  
而非學哉未易窺也然曰汝以子為多學而識與子  
一以貫之學識貴乎約矣多聞擇善多見而識亦未  
嘗不博也吾嘗終日不食終夜不寢以思無益固為

之不厭矣君子有九思學而不思則罔亦未嘗不思也  
行有餘力則以學文若不專于行矣文莫猶人躬行  
未得謂不重夫行也可乎天何言哉予欲無言言若  
可廢矣有德者必有言吾與回言終日謂不重夫言也  
可乎好仁好知好信好直剛勇苟不好學則有蔽矣使  
德之不修徒曰學之不講是吾憂也可乎學詩學禮學  
易學韶咸有益于得矣使博學于文不能約之以禮欲  
其弗畔于道也得乎君子病無能焉固

天縱之將聖又多能矣何為又云君子多乎哉不多也生而知之者上也蓋有不知而作我無是矣何為又云吾有知乎哉無知也默而識之下學上達謂學非覺也可乎敏事慎言就正有道即以好學許之恐不專在于覺矣好古敏求見賢思齊謂學非效也可乎曰也不遷怒不貳過則以好學許之恐不專事夫效矣故子貢曰夫子焉不學而亦何嘗師之有是學也果可以一字一義訓釋之否耶是故欲學孔子之

學必真知孔子之大學而後可或曰夫子之學信大學矣學者即欲學孔子之學多見其不知量也噫後學各因其資之所近才力之所及于以自成其學可也若願學孔子欲執一廢百反曰孔子不可學謂之叛孔非歟

問聖學必有宗也觀諸賢皆問仁果聖門必以求仁為宗乎曰玩其篇章次第首云學習即次以孝弟為仁之本又次以巧言令色鮮仁則謂仁為聖門學脉

此亦可徵况真知為仁之本在孝弟鮮仁之害在巧  
言令色而仁亦過半矣問聖門高弟無踰顏子固夫  
子獨以克復傳之其餘諸子不過各以資之所近者  
語之耳後學為仁安敢遽希克復之乾道乎曰仁一  
而已矣聖門如顏淵仲弓司馬牛樊遲子貢子張皆  
問仁而夫子教之謂非因人而施不可也後儒遂因  
各賢之造詣疑聖教有偏全小大之殊使果有偏全  
小大之殊則仁亦參差不齊矣如克己復禮信乎全

而大也非顏子不能也出門如見大賓使民如承大祭已所不欲勿施於人時時處處是此一點如見如祭勿施之心尚與克復者異乎顏淵仲弓信能請事斯語牛也疑訥言不足以盡仁視回雍霄壤矣向使因訥言一語而能以三隅反則非禮勿視勿聽勿動者不已涵畜於訥言之中乎樊遲三問夫子三答之如以其言而已矣則將以何者為終身之依據也然在居處則為恭在執事則為敬在與人則為忠非即

愛人之仁乎夷狄不可棄非即先難後獲之功乎謂諸子領畧聖教各有不齊則可謂聖人教諸子有偏全大小則不可以語仁矣

仁人也人而不仁不可以為人也何近儒談萬物一體之仁者不假修證色色具在徵之聖門祇見其不足據也是故將以仁為難歟一日克己復禮天下歸仁有能一日用力于仁未見力不足者將以為易歟何為罕言仁而謂若聖與仁則吾豈敢將以為近也



仁以為己任不亦重乎死而後己不亦遠乎將以為  
遠也仁遠乎哉我欲仁斯仁至矣苟志于仁無惡也  
將以為人心之固有而不待求歟君子無終食之違  
造次顛沛必于是雖之夷狄不可棄也將以為求之  
方寸而足歟凡視聽言動居處執事與人交以及出  
門使民能行五者于天下皆是也將謂取足於己而  
已乎君子以友輔仁事其大夫之賢者友其士之仁  
者皆仁之資也將謂其必藉于人乎當仁不讓於師

己欲立而立人己欲達而達人己所不欲勿施於人  
為人由己而由人乎哉將謂如伯夷叔齊欲仁即得  
仁乎然諸賢如由求赤雍與憲之克伐怨欲不行者  
何為皆未知其仁將謂此心潔淨即是仁體如微箕  
比干同一仁乎令尹子文陳文子止得稱為忠清皆  
未知焉得仁也且三月不違回之外無聞焉其餘日  
月至焉已矣而堂堂乎張也且難與並為仁也于此  
會而通之神而明之仁其庶幾矣

聖人仁愛天下老安少懷之心無日不貫徹流通於斯民曰吾非斯人之徒與而誰與天下有道丘不與易也所以周流轍環棲棲于魯衛宋陳齊蔡荆楚不遑寧處如晨門荷蕢楚狂沮溺莫不識其心不曰有心哉擊磬乎則曰是知其不可而為之者與不曰是知津矣則曰鳳兮鳳兮何德之衰故請討正名欲往公山佛肸之召此其心蓋可識矣其如當時君相不獲一遇何乃于魯于齊于衛皆明日遂行逮絕糧于

陳遭桓魋于衛叔孫武叔毀于朝俾綏來動和之化  
雖三月而可暮年有成者卒不得一試於邦家乃欲  
居夷浮海道大莫容一至此極故不得已有歸與之  
嘆閭閻侃侃曰琴點瑟日侍其側洙泗之濱卒以衍  
道脉于無窮孰非仁天下之心哉噫求仁者跡夫子  
之素履可以識仁矣何也夫子渾身一仁體故以天  
下為一家中國為一人萬世萬物為一體也大學曰  
古之欲明明德於天下非孔子而誰苟有志于仁而

不求仁于孔子之身以為學習之準乃守一見一說以談仁之理抑末矣

問學以淑已教以淑人其理一也學以求仁為宗而教之所施何以見其仁愛之心曰不厭不倦無行不與非仁而何特因人異施莫覺其立達之無方耳如賜因論學悟詩商因論詩悟禮均許其可與言詩是與其進者仁之也求也退故進之由也兼人故退之一進一退非仁之乎師也過商也不及而均約之以

中非仁之乎冉子之與過于惠原憲之辭過于廉而均裁之以義非仁之乎不忮不求由也終身誦之則曰是道也何足以臧未嘗不進由也而求也無乃爾是過與何嘗不退求哉子貢方人曰夫我則不暇亦退之也狂者進取乃曰吾與點也又因其進而進之矣他如小樊遲之稼圃矣又示之以大人之學忍宰子之短喪矣又啟之以三年之懷警晝寢攻聚斂戒闕黨進互鄉斐曉孺悲杖叩原壤無非此意推而廣

之凡問仁問孝問政同而答則人人殊在當時若各  
因一時之事機在後世實為不易之典則無非其仁  
愛所寄也又問回之約參之一得非其一定之教乎  
曰聖人變動不居不可為典要蓋參也省身實踐懼  
其滯於有也故示之以一貫而一唯之外渾然內外  
之都忘回也仰鑽瞻忽懼其淪於無也故誘之以博  
約而卓爾之餘脫然隱顯之俱化聖教造就人才如  
化工陶鎔品彙莫測其所自而仁愛實無窮焉豈如

後人單提片言以立教便謂之一謂之約者所可倫  
哉夫子學不厭處即是教不倦處故無行而不與二  
三子者是丘也謂夫子有文行忠信之四教則可謂  
其止此四教則不可謂羣賢所造有德行言語政事  
文學之四科則可謂夫子設此四科以造就羣賢則  
不可所以語上語下雖不同有教無類則一也雖然  
主忠信一言則尤為聖門所喫緊

孔門以顏子為最故稱賢稱好學祇歸諸顏子及其



死曰天喪子後人遂謂顏子絕德非人所可幾及迨  
稽其素仁曰不違樂曰不改怒曰不遷宜無怒哉過  
曰不貳宜無過哉空曰庶乎屢空空宜空空哉犯曰不  
校未嘗無犯也善曰無伐勞曰無施亦自願其如此  
也宜顏子必不可學哉且曰顏子死聖人之學不傳  
及究其所以不傳者則謂其墮體黜聰心齋坐忘人  
莫能窺其窈冥恍惚之秘密也然亦曷為不載諸二  
十篇哉嘗觀曾子稱其虛止云實若虛非致虛極之

謂也稱其無止云有若無非宗無相之謂也博文約禮欲罷而不能克已復禮請事于視聽言動何有于虛室生白之謂哉雖孔子予欲無言特以倣子貢耳于回則曰語之不惰曰與言終日曰於吾言無所不悅何為諄諄循循而回也拳拳服膺勿失哉然則謂顏子絕德不傳者不求之論語此聖學所以絕而不傳哉

孔門惟曾子獨得其宗謂其唯一貫之傳也但既得

其宗宜如後人日逐語言惟敷衍一貫可矣所云三省吾身或在未唯之先然臨終啓手啓足又惟三省之叮嚀何也聽執燭童子之言而易箒何異三省之密乎且當時方唯于一呼之頃未幾出答門人即曰夫子之道忠恕而已矣又何為便異於一貫之語乎然參竟以魯得之註云魯鈍也故以推魯視會子矣考史記孔子沒時曾子年方二十七耳則其唯一貫必在數載之前謂之遲鈍可乎蓋參本篤實之人觀

其平日自治誠切如十目所視十手所指無時無處而非慎獨之功所以任重道遠死而後已無往非忠恕誠實之所在又何往而非慎獨一貫之旨哉又豈如後之傳宗者言言必一貫云乎哉

仲尼發情顏子竭才曾子死而後已此正是聖門學脉所繫後人不能希聖希賢病正坐此

聖學之全固揭之首章矣併玩志道據德依仁游藝修德講學徙義改過共學適道與立與權知及仁守

莊蒞動禮知之好之樂之可見學有全功不可闕功  
有漸次不可紊也

欲惡人之情也富貴貧賤人之遇也聖人與衆人同  
而為學之機實決于此故懷居不可以為士恥惡衣  
食不可與議道而不求安飽能敏慎就正便謂之好  
學又曰富而可求也雖執鞭之士吾亦為之如不可  
求從吾所好曰不義而富且貴于我如浮雲至以喻  
義喻利判決君子小人亦甚切矣噫仲尼大聖也疏

食曲肱樂在其中顏淵大賢也簞瓢陋巷不改其樂然則志孔顏之學尚可以溫飽累其心哉

夫子盛德固難形容只溫良恭儉讓五字描寫聖真令萬世如見併觀燕居申申天天鄉黨恂恂似不能言宗廟朝廷便便惟謹之類可見渾身是道也奚必言言博約語語一貫然後為傳道哉

聖人之學性學也人只見論語言性者一便以為性非上智不足與語又謂性相近此兼氣質言故有美

惡不齊而性善之旨幾不明于孔門矣觀孔子繫易  
謂繼善成性後人却云與論語不同姑置勿論如人  
之生也直斯民也三代直道而行者也會謂直亦美  
惡不齊乎仁義禮知性也孔門以仁立教曰苟志于  
仁矣無惡也會謂仁亦有美惡不齊乎若謂仁同性  
善則性不可以美惡言也彰彰矣是故觀仁可以知  
性觀孔子教人之求仁則知孔門教人之盡性也

論語中所記多是面相授受忠告善道辭簡意盡蓋

平日聖德既已服其心當時誠意柔顏溫辭和氣又足以啟其信要皆以無厚入有間而不覺其入之深焉真是法言不容不從而改巽言不容不悅而繹雖羣賢之辭亦自與他書所記載者迥別曰遊於聖人之門難為言他書義理雖邃密尚有可以著精神思慮處惟論語一書初讀之似覺日用平常布帛菽粟人人不可缺者潛心久之纔見得如天地包含徧覆聲色象貌充塞太虛成大成小各正性命意似化育



之神卒莫得而形容之矣然玩味愈久其意味愈覺  
雋永一草一蟲莫非造化之全功一字一語莫非聖  
門之全學尊翁河涉長江者尚可遡流窮源而假舟  
航以泛溟渤終莫覩其涯涘淵淵浩浩何所容其測  
識哉

論語

孔子其天乎論語二十篇其諸天之時行物生所散  
見乎何也聖神功化若未易窺測而不出乎庸言庸

行之間故曰吾無隱乎爾吾無行而不與二三子者是丘也即其首揭學習一語啟迪萬世要亦夫子自道也蓋自志學以至從心終生發憤不厭不倦無非求滿此志學之分量耳但學之宗旨不越求仁何論語記載若此其不齊乎自今觀之孔子非多學而識也信然矣學詩學禮學易學文好古敏求乃諄諄以此為訓而子貢亦謂其焉不學者非欺我也故教一也曰有教無類足矣然博文約禮啟憤發悱教固多

術而進求退由且因人異施焉政一也曰為政以德足矣然節用愛人尊美屏惡政固多端而賜達求藝且因人異用焉同一問孝也如無違疾憂敬養色難孝可一端盡乎同一問政也如先勞無倦兵食民信政可一端盡乎至同一問仁克復一語若足以盡為仁之要矣然不特敬恕訥言問答異即樊遲一人三問三答不可為典要有如此况已欲立也即欲立人已欲達也即欲達人既直指仁者之心體已不欲也

即勿施於人又詳示學者之真功此無他言教若人  
人殊隨物曲成人則一也如一火散為千燈異照同  
明一水流灌百川殊派共海所以賜也滯于守一承  
其教即悟詩意之無窮商也拘于見一承其教即悟  
執禮之有本回也仰鑽涉於無誘之以博約而卓然  
有真見參也省身泥於有啟之以一貫而唯然無方  
體悅開與點化雨及時老安少懷物各得所無行不  
與茲可槩見矣豈獨言教為然哉試從孔子所自躬

行者觀之仕以行義固欲以有道易無道至轍環問  
津畏匡要宋絕糧陳蔡叔孫毀于朝接輿沮溺譏刺  
于田野斯時也若可以已也猶南子可見陽貨可與  
言公山弗擾佛肸召可往此其心何心也鳥獸不可  
同羣非斯人之徒與而誰與此其仁愛天下之心浩  
浩乎一天之時行不息物生不窮也然衛靈齊景季  
桓子一有不合明日遂行猶之乾道變化孰得而測  
之哉可見周流列國固期明良之一遇而樂得英才

以教育之洙泗之濱閭閻侃侃俾千古道脉迄今不  
墜雖未得綏動乎春秋之邦家然宗廟百官之富美  
萬代如見者以有論語在也所以四科並列四教錯  
陳道固不越乎日用常行而人皆可為堯舜疊疊乎  
聯屬四海九州為一體會通百千萬載為一時孰非  
孔子求仁一脉以詔誥于無窮哉是故天不可窺也  
即其運行時物者固可測其無言之蘊孔子不可作  
矣即其散見論語者亦可窺其無隱之精然則學孔

子之學者一宗乎論語之所記載不特下學上達之  
法程有可依據雖各舉一言以服膺亦可入道庶不  
至耽空寂泥詞章舉一廢百如異端之流弊也雖然  
他書縱隱微秘密凡穎慧之士尚可以智見測度自  
謂妙悟神解獨論語一書真所謂淡而不厭簡而文  
溫而理徹上徹下縱于聖學有深造者終不能一一  
與之相當此論語所以難學也噫人人讀此論語程  
子謂讀了後又只是此等人便是不曾讀反觀以為

何如

學習

論語二十篇具載孔子誨門弟子及對當時國君大夫何循循善誘哉今讀其書欲會通其指歸如入孝出弟詩書執禮文行忠信無一非教蕩蕩乎莫得而名之矣後人欲執泥一說標為聖門宗旨何異于日星露雷各指一以名天道哉但聖道大不可窺其因材而篤之教又不可測譬盧扁之門諸病者羣聚乞



醫鍼砭所施動中膏肓片咀所投頓愈痿痺凡起死  
回生靡不藥之為全人焉雖聖神功巧不可名狀幸  
而穴法良方與脉訣並存乃活人心之所寄也論語  
所載孰非孔子之方脉哉醫必有活人心始可語良  
醫而學之一字乃孔子頂門針法也故首揭示人只  
在學習得非一書大旨之所關乎苟讀其書遵其教  
而學之旨意且未了徹則與聖學異趨者有之矣不  
知論語所寄乃聖門全學特不可各執一說以訓釋

之也何也學者肇于說命大發明於孔門後儒訓釋  
祖學于古訓者則曰學之為言效也然稱顏回好學  
乃在不遷怒不貳過效豈足以盡之乎因諧聲轉註  
者則曰學之為言覺也然言君子好學乃在敏事慎  
言覺豈足以盡之乎據為之不厭者則曰學即躬行  
是也然夫子焉不學而博學於文好古敏求為豈足  
以盡之乎至謂離經辯志以博文強記為學者取證  
于何必讀書然後為學之語是謂誦讀非學不可也

學易學詩學禮學道又豈誦讀云乎哉可見學之所  
包者廣未可專以一字一義偏言之也學之義不明  
况好學乎所好不在乎學則雖仁知信直勇剛俱各  
有蔽况所學一偏效則模倣格式覺則寂照圓通為  
則砥礪行檢記誦則訓詁辭章各就所見以求進益  
使聖學之全不見於後世者職此故也欲學聖人之  
全學者惡可于論語開卷第一義而忽之哉然亦不  
必他求也本諸身心性命合前諸義而會通之大義

可默識矣習之義云何嘗讀易六十四卦文王獨于  
坎曰習坎周文孔彖皆因之蓋水之習于坎也自古  
迄今逝者如斯盈科放海不舍晝夜是他物之習也  
尚有息時惟水之習也無一時息觀之習坎時習之  
義了然矣大象曰君子以常德行習教事常習時習  
意也兌之大象曰君子以朋友講習是習亦澤水取  
象兌說也觀之水淫溢決洽活潑動盪無時不習即  
無時不悅學習而悅亦可得意于象外矣何待習孰

然後悅乎况兑悅在乎朋友之講習則朋來而樂不待言矣可見如此而學即如此而習體天行健自強不息故悅樂在我又何待於人之知不知為欣戚哉此其所以為君子也百川學海而至于海者惟在時習之不已君子之學猶是也或曰時之義果無間斷如禹之惜陰抑善變通如巽以行權耶曰皆是也天之運也積十二時以成日積四時以成歲惟其無間斷是以常變通也君子之時中也惟時時此未發之

中而不離須臾則喜怒哀樂皆中節而時措時出在  
其中矣蓋于孔子觀之自十五志學以至七十從心  
曰發憤忘食曰學而不厭無非及時進脩之意則是  
學而時習乃其所自道焉所以與時偕行而為聖之  
時者此也然則學豈無其要哉詳玩論語二十篇殆  
不越乎求仁而已矣人心生生之機本無一時間斷  
學者學此習者習此悅者悅此故其篇章次以孝弟  
為仁之本又次以巧言令色鮮仁皆有深意存焉則

凡各篇散見固皆聖神功巧之妙用而欲立欲達老  
安少懷實不外乎活人心之真脉訣也信乎論語一  
書惟在學習說三字而孔門學脉不外求仁一言

### 志學

孔子萬世師也志聖學者必師孔子而孔子之學何  
學乎觀其由十五以至七十自述志學而立不感知  
命耳順不踰矩若後世年譜然其終身忘食忘憂不  
厭不倦亦若可想見矣但其散見於論語所記錄者

曾未見有希奇越常可喜可愕為古今之絕德何哉  
然不如丘之好學乃其所自道焉不過曰好古敏求  
躬行未得且以脩德講學徙義改過未能為己憂自  
言所志亦不過曰老安少懷朋友信而已矣其在鄉  
也不過恂恂似不能言其在宗廟朝廷也不過便便  
惟謹其接人也不過無衆寡無小大無敢慢見衰冕  
與簪者雖少必作過之必趨其日用常行不過食不  
語寢不言食不厭精膾不厭細紅紫不以為褻服而



已矣至事公卿父兄喪事不敢不勉不為酒困則曰  
何有於我仁不憂智不惑勇不懼則曰丘未之能然  
則聖人之學所以師萬世者果安在乎況以此而為  
之不厭即以此而誨人不倦其教不過文行忠信而  
已其雅言不過詩書執禮而已其訓弟子不過孝弟  
謹信愛衆親仁而已問孝不過曰色難敬養問政不  
過曰足食足兵若仁則聖學所宗也曰志即無惡曰  
欲仁即仁至曰有能一日用其力于仁矣乎未見力

不足者所以羣弟子問仁不曰訥言則曰居處恭執  
事敬與人忠而已後人乃云此特其淺淺者然出門  
如見大賓使民如承大祭亦何嘗離邦家也猶云此  
非其至者然一日克己復禮天下歸仁亦何嘗離乎  
視聽言動也自今觀之將謂其家庭有異聞乎聞詩  
聞禮已矣故孝友即為政也將謂其及門有異教乎  
啟憤發悱本有教無類也是故雖曰無知未嘗不叩  
竭兩端雖曰君子不多未嘗不多聞多見雖曰無可

無不可未嘗不用行舍藏雖曰知我其天未嘗不下  
學上達信乎無行不與人人可以與知而與能也然  
此自後學揣摩聖人或不足以窺其微乎觀其稱君  
子好學不出乎敏事慎言稱顏回好學以告其國君  
大夫亦惟在不遷怒貳過實實可信矣况及門三千  
速肖者七十德行言語政事文學縱如閔冉之儔尚  
無與於聖學之傳焉至稱天喪予獨歸顏回回之竭  
才卓爾初不越乎博文約禮而樂雖超乎簞瓢之外

然無所不悅未嘗不由於終日之與言也回之亞參  
獨得其宗以其有一貫之唯也又只曰夫子之道忠  
恕而已矣則未悟之前功勤三省何啟手啟足之時  
尚惓惓于三貴乎哉其他如商之起予不離乎詩禮  
點之可與不離乎春風詠歌雖語師以參前倚衡之  
見不離乎忠信篤敬雖語賜以無言之天不離乎時  
行物生故賜稱夫子無常師亦未嘗不自識大識小  
之賢者而學之也然則聖人之學果安在乎論語二

十篇果皆聖人粗迹而未足以記其蘊奧乎何為聖  
學皆不離倫物言之顯卒無希奇越常者如異教  
浸淫人心而莫之解也噫夫子嘗自言之矣索隱行  
怪後世有述焉吾弗為之矣君子遵道而行半途而  
廢吾弗能已矣君子依乎中庸遯世不見知而不悔  
惟聖者能之于此真信不疑聖人志學宗譜昭然盡  
發洩于論語各篇章者當不待辯說矣雖然世之習  
舉子業者莫不曰志學即志乎不踰矩之學也誠哉

是言也聖人一言一動載在論語者孰非其心矩之  
顯示乎然則志聖人之學者必師孔子又有出于心  
矩之外者乎奈何聰穎之士悅怪貪竒忽邇慕遠效  
異教單提直指標一說以為秘藏捷徑不可以能智  
求不可以思議盡不可以修證得不可以權貴顯自  
讚無上妙道世所希有雖舉一廢百勿恤焉又何怪  
其視論語記錄悉學究之常談哉噫士真矢志聖學  
而矩在吾心且幸而論語具存也異教惡得而惑之

周監二代

四海風俗美惡一朝政治污隆係大君所尚何如而  
創業之君尤一代好尚之根源也好尚不齊大畧不  
過文質兩端已爾雖曰文猶質也質猶文也二者不  
可偏廢也但無文之質不失其為質無質之文則不  
可以為文故與其文有餘質不足莫若文不足而質  
有餘也况質則渾樸非人情所喜故人君欲敦篤儉  
約為天下先猶日見其不足也若文則侈靡華麗乃

人情所爭好不待倡導祇日見其有餘矣蓋自天地開闢以來觀其變態之漸乎洪荒之世純乎質也帝王代興風氣日開耕稼興而飲茹毛血者不復見矣簞簋興而汙樽坏飲者不復見矣書契興而結繩紀事者不復見矣由羲黃而唐虞而夏商而成周吾見質之日趨于文猶江河之日趨于海雖欲挽而止之不可得也何後儒因孔子謂周監二代郁乎文哉遂有周尚文之說因孔子謂殷因夏禮周因殷禮遂



以所因謂三綱五常所損益謂忠質文三統即如夏  
建寅商建子周建丑改時改月已于春王正月詳辨  
之矣若夏尚忠商尚質周尚文其果然哉自後世品  
題三代猶可說也謂禹湯文武有心以尚之則非矣  
何也粉飾日增謂能修上世之不足而務求前人之  
所未完以為成功而不知其不若使上世之質未散  
而前人之樸常在也况世道愈趨愈下雖後代創業  
之主未有不欲挽侈靡之習以還之渾厚者厥後每

每以文而滅質也三代君相皆聖人也獨見不及此以各審所尚乎桀為瓊宮瑤臺紂作竒技淫巧俱以文彩靡麗竭民脂膏自取滅亡乃謂忠之敝愚質之敝野何指而云然也書曰纘禹舊服曰反商政政由舊亦未聞其救忠以質救質以文也即如武王勝殷未及下車封黃帝堯舜後下車封王子墓釋箕子囚表商容閭凡此莫非崇尚忠厚質朴豈假此潤色太平而濟其質之不及哉可見忠質文迭尚雖載在禮

經不過因孔子贊周文郁郁故牽合傳會之耳不然孔子從周從其文也先進之後反欲從夏商野人之陋與武周尚文之辨只此可以決之矣

一貫

古今言道統者堯以執中傳之舜孔以一貫傳之曾先聖後聖無間然也欲求一貫之旨蓋求諸執中之傳乎子思子本家學作為中庸曰喜怒哀樂未發謂之中發而皆中節謂之和中也者天下之大本也和

也者天下之達道也又曰君子之中庸也君子而時  
中惟時時此未發之中而大本立焉則溥博淵泉時  
措時出莫非太和之流行莫非此率性之道而達之  
天下沛如矣一即中也中即未發也虞廷孔門豈二  
道哉且大學乃曾子傳自孔門者也明德親民止至  
善而要在知止知止則定靜安慮得凡天下國家身  
心意知物一以貫之矣知止非即一貫執中之旨乎  
所以戒慎于不覩不聞斯日善天下之色耳善天下

之聲天聰天明所自出也敬信于不言不動斯言而  
世為天下法行而世為天下則聲律身度所自來也  
君子多乎哉不多也無能而無不能也吾有知乎哉  
無知也無知而無不知也易無思無為也寂然不動  
感而遂通天下之故也為物不貳則其生物不測天  
地此一貫也故曰維天之命於穆不已此天之所以  
為天也不識不知順帝之則聖人此一貫也故曰於  
乎不顯文王之德之純此文王之所以為文也天何

言哉四時行焉百物生焉天何言哉其所以時行物  
生者亦何言之所能盡哉天下何思何慮天下同歸  
而殊塗一致而百慮天下何思何慮其所以同歸一  
致者亦何所容其思慮哉故曰天地之常以其心普  
萬物而無心聖人之常以其情順萬事而無情也廣  
引博証所謂一貫所謂執中不可以會通而默識之  
哉或曰參唯一貫矣乃以忠恕盡夫子之道果以近  
易者曉門人歟蓋道無遠近難易而雜以有我之私

者二之也中心為忠如心為恕惟中心無為渾然未  
發之體一切如心以行之即所謂己所不欲勿施于  
人則直下人我一體己私盡融推之天下何往不達  
而道宜有餘蘊哉或又曰舜于執中之外益之以危  
微精一曾子一貫之外易之以忠恕何歟蓋道本中  
也本一也然而無定在無定名也舜曾恐人求之幽  
深玄遠故危微精一忠恕之言無非欲人反求諸身  
心而近裏着己有所持循以為功也若執言詮則人

人殊矣孔之一即異乎堯之中矣孰知盤隨山移而  
針則有定舟隨水轉而舵則常操使操舵用針者無  
活法焉則執中無權執一賊道弊可勝言哉雖然堯  
以執中傳之舜舜傳之禹孔以一貫語乎參又語乎  
賜道固得人而後傳也不知其語舜禹語曾賜正所  
以教萬世無窮也但自生民以來前而唐虞羣聖人  
都俞吁咈協恭和衷相與警惕于朝堂之上此一時  
也君臣即師友也繼而春秋羣聖賢考德問業義重



聚樂相與切磋于洙泗之濱此一時也師友即君臣也其間如湯尹文武周召翕然唐虞之休風如周程張邵朱陸究乎孔氏之家法不如此而望其德業之相成聖學之大昌未之有也是故有志聖學而執中一貫其道脉如故也在天在田聖作物覩聲應氣求雲龍風虎不有曠世相傳者在乎

發憤

自吾人之視聖人也從容中道渾然純一而不已自

聖人自視則常若不及歎然望道未見之心也惟聖不自聖常若望道而未之見此所以純一不已而為天下之至聖乎何也道無窮學無窮聖人之心與之俱無窮也蓋觀諸天乎天行一晝夜周三百六十五度自混沌初闢以來運行無一息停惟健故也聖人體天行健所以自強不息發情忘食樂以忘憂不知老之將至也聖人其天乎情非他也即人心勃然之生機也樂非他也即生機之欣欣暢達不能自己也

人人有此憤機特不能自開發爾不然何為以不善  
名之即艱然變色也或偶一發動而真機不露不能  
常發常憤中心不樂反自過其生生之機矣聖人之  
為人也惟恐一日不能自盡其分惟恐一息不能自  
全其天以自過其生機故其憤常發雖食且忘焉自  
他人觀之若或不堪聖人則孜孜汲汲油然豁然若  
有必如是而後能自快于心者外此又何憂乎所謂  
樂則生生則惡可已則不知手舞而足蹈矣蓋惟常

憤自爾忘食夫我則不暇也惟其常樂自爾忘憂憂亦無自而行也惟其常發憤而忘食所以常樂而忘憂即所謂我樂此不為疲也常憤常樂一出于天機自然之發生而不參之以一毫人力且不自知其憤不自知其樂不知老之將至如草木自萌蘖初發至合抱參天一段生機欣欣向榮無一息間也或曰夫子天縱將聖生知安行何事情發不過謙已誨人耳不知聖人言皆實言而發憤之言乃所以自狀其為

人之實故曰為之不厭曰學而不厭曰好古敏求曰不敢不勉曰一日用力于仁曰吾弗能已曰學如不及猶恐失之曰吾嘗終日不食終夜不寢曰不如丘之好學皆發憤之意也不憤不啟教人且然何獨于其所自學者而疑之回也欲罷不能參乎死而後已其家法固如此也或曰始而憤終而樂惟其道有得與未得故一憤一樂相需而不窮耳安能一憤即樂耶殊不知勇士不忘喪元且有視刀鋸鼎鑊甘如飴

者顏子簞瓢不改其樂豈始猶不樂必待久之而後樂耶况發情忘食苟非真樂在中舉天下無以尚之雖一日且難之矣安能由之以終身也或曰日用飲食在凡人且安其常使聖人非自謙之意則情發遽至忘食何有于動容周旋之中禮乎不知安于飲食宴樂之常者此所以為凡人也若好學君子且不求安飽而敏事慎言雍容自有所在矣觀舜之羹牆見堯引慝號泣禹過門不入三飯三哺文日昃不遑暇

食周終夜仰思坐以待旦孰非發情忘食罔敢暇逸  
之舉動乎或曰樂本吾性真體也發情忘食正以求  
此忘憂之真樂耳不知情樂之先後一分則以情為  
發心之初樂為得道之效似亦有見如此則情以求  
樂既樂即無所事情矣故近世之學有學宗自然頓  
悟樂體則樂即是學流連光景玩弄意趣調停于勿  
忘勿助間自以為鳶飛魚躍春風沂水而超然其自  
得焉所以終生悠游自在以小成自安不復更求進

益間有情機生發反謂障礙性體而遏絕之矣質質  
然千載無真儒者其弊正坐此也非謂樂不宜也情  
樂一機原無間隔而況以意趣為樂者非自性之真  
樂乎試觀豪傑之士卓然自樹且不肯陶情適興虛  
度光陰又肯以宴安為超脫也耶可見情之外無樂  
情非強作樂之外無情樂非意興雖情樂在聖心者  
淵浩莫窺而其生機活潑疊疊忘倦或亦有可想像  
焉者十五志學至七十從心其進修固為有漸而情



樂諒無一息間斷是亦天行之健矣雖然望道未見  
日進無疆固孔子聖不自聖之心亦孔子自道其實  
也若自吾人視之謂其不思不勉從容中道者此也  
謂其與天並運純一不已者此也外此而謂孔子別  
有一道為聖不可知則非吾之所知也已噫自生民  
以來未有孔子孰有如孔子發憤者哉願學孔子者  
信其發憤一語而運身轉動不自安焉則知恥近勇  
聖學其庶幾矣

絕四

聖人與人同以其心本同也而其所以異者由人皆自失其本心惟聖人為能盡之也聖人所以能盡其心者豈能于其本同之心有所加乎去其所以累吾心者而已矣蓋人心本廓然太虛洞然澄徹雖無所不包無所不貫而物感即應事過不留如止水無波或隨風變態亦與風俱恬如赤日麗空雖普物畢照亦與物俱寂故靈明常炯無有一毫能為之累者其

本體也而其所以累之者豈有他哉曰意曰必曰固  
曰我是也人惟不識其本心故隨念遷轉逐境支離  
外之所感萬有不齊中之所萌紛雜靡定或有所為  
而動或無所為而亦動坐馳卧游生東滅西倏起倏  
止千態萬狀莫可窮詰皆意也由是而事求可功求  
成斷斷乎期于必遂而後已而必則意有定在矣由  
是執之彌堅持之愈確硜硜然膠滯不通而固則意  
必莫之返焉由是而一事之行一物之得自一念以

至萬念惟知有我而已凡自是自足自私自利皆我之為病也匪特不善之念不可有苟有意為善必欲如此以為之至于固守其善私之為一己之善也是亦有我之病也使四者有一焉則心之本體已為之錮蔽窒塞况四者相為牽引循環無窮而人之所以自失本心不能同流天地孰非意必固我之為累哉此在常人則皆然也間有豪傑之士謂四者皆吾心所不可有而竭吾力以遏之于以禁止其意禁止其

必禁止其固禁止其我凡所以堅忍克制使不得萌于中形于外也無所不用其至視常人輾轉牽纏於意必固我者大相逕庭矣但母之一言用力不為不專不為不苦亦可以為難矣然縱能拔去病根無復潛藏隱伏之累而尚假人力以參之非天性之自然也聖人絕無此四者非但無意必固我也如母意母必母固母我皆聖人所絕無也何也意必固我常人之通病也母意母必母固母我賢者之用功也聖人

并禁止過絕之功而亦無之到此地位一毫力不可  
着大而化聖而不可知也豈聖人之心與人異哉夫  
人之心周流變動本無方體無知而無不知無為而  
無不為無思而無不通無可而無不可是心也謂其  
有意必固我而有之未免自蔽其心也謂其無意必  
固我而毋之亦豈善事其心者乎即如有意不可也  
欲其無意而禁止之非意乎有必不可也欲其無必  
而禁止之非必乎有固有我不可也欲無固無我而

禁之非固與我乎蓋水本動也因風以成文固不可  
執波以為水而必欲水之無波焉非真知水者矣日  
本明也隨物以普照固不可執照以為日而必欲日  
之無照焉非真知日者矣是以聖人無心以制其意  
而必誠其意不可以意名之也無心以制其必而好  
謀有成不可以必名之也無心以制其固而確乎不  
可拔不可以固名之也無心以制其我已欲立而立  
人已欲達而達人不可以我名之也何思何慮同歸

殊途不逆不億抑亦先覺從心所欲而不踰乎矩欲  
即矩也何四者足累其心又何患四者之為心累而  
役吾心以為之防耶此聖人所以適得乎心體之常  
生生不息化化無窮不可以起滅論不可以有無言  
矣否則謂聖人何用禁止者不為無見而改女作無  
豈知既云絕矣又曰無焉於文義果相安乎不識吾  
人之本心者不足與語聖人之心不識聖人之心者  
惡可與語絕四之旨



聞韶

甚矣樂之難知也非聞聲知音聞音知樂之難也難乎聞其樂即知其德焉耳至聞樂知德千載儼然神交為尤難也是故孔子在齊聞韶豈三月之間日聞其搏拊夏擊遂至肉味不知哉蓋耳與韶樂俱融心與重華俱釋精神凝結想自韶樂外舉不足以尚之記者特指飲食一端以見聖人用志不分云耳若徒聆音察理知其蓋天載地盛德蔑加則季札一覩聞

間悉已洞澈之矣何待三月亦何有于忘食味耶或曰聞韶至忘肉味孔子亦不過知韶之美善已爾子之意乃謂舜孔相孚若有可想像不可以語言形容焉者子于何而見之哉曰神不一不足以達化思不沈不足以通微惟誠精之極則鬼神與通故孔子雖聰明天縱而好古敏求無所不用其極也昔嘗學琴于師襄十日不進襄子曰可以益矣孔子曰未得其數也有間曰可以益矣曰未得其志也有間曰可以

益矣曰未得其人也有間曰有所穆然深思焉有怡然高望而遠志焉曰丘得其為人黯然而黑頎然而長眼如望洋非文王誰能為此也襄子避席再拜曰師蓋云文王操也此雖學琴一事亦可見潛神之至矣揚子雲曰潛天而天潛地而地天地神明而不測者也心之潛也猶將測之况于人乎况于事倫乎又曰昔仲尼潛心于文王達之然則忘味于齊也得非潛心于舜乎是即學琴而聞韶者可知也即潛心于

韶而學易韋編三絕又可知也嘗自述其人曰發憤  
忘食樂以忘憂不知老之將至可見終生發憤則終  
生食且忘之又何有于肉味哉信乎不如丘之好學也  
或曰先孔子而聖者非一人也未聞神不兩用如此  
專切何歟曰見堯羹牆非舜乎舜之潛神于堯蓋可  
想也禹思天下之溺由己至八年三過不入不知有  
家矣手足胼胝不知有身矣文王無逸至日昃不遑  
暇食周公思兼至坐以待旦不知有飲食寢興之節

矣何獨于孔子而疑之或曰寂然不動感而遂通心  
體之常也若有所好樂則心不正而食不知味在他  
人則謂之心不在矣曾謂聖心亦有所歟曰三月不  
知肉味門人記之矣不圖為樂至斯孔子自嘆之矣  
正嘆為韶樂之深不圖一至于此非嘆韶音之善美  
也即其哭顏淵不自知其慟何以異此蓋情所當慟  
雖慟且不知而哀不失其節心有當思雖味且不知  
而思不出其位此未易言也蓋觀諸天乎日月朗明

萬象畢照此太虛也雷雨滿盈萬象網緼此太虛也  
是日月雷雨皆天之用也萬象畢照于日月之明而  
非著于空萬象網緼于雷雨之屯而非蔽于物聖心  
一天也使以衆人意見揣度聖心且不知此心體量  
必如之何而後盡也而欲盡其心者又耽戀虛明之  
景象執滯圓覺之言詮安足以窺聖人聞韶之心哉

至德

道雖人所共由德乃人所自得聖人與人為善人苟

有一德鮮不亟稱之焉然未嘗輕以至德許人也獨于周室既以至德許泰伯矣又以至德稱文王嘗讀易而紬繹至德之義于乾曰大哉于坤曰至哉蓋坤元順承天道是以德合無疆而坤之至德以此文王三分天下有二以服事殷恪共臣職此所以合德于坤也稱為至德為其讓天下于紂也予知之矣其在泰伯也果謂其當商周之際其德足以朝諸侯有天下乃棄而不取又泯其迹為荆蠻之逃此德之所以

為至極歟如此則泰伯為至德在太王為不臣矣然則翦商之說非歟魯頌居岐之陽實始翦商自後人觀之太王遷岐之日實周室代商之始謂其肇基王迹非謂其志欲取商也且太王時商祚方隆其不得已而遷岐求避狄難且不暇安得遽懷不臣之心欲翦商之祚哉已之土地且捐以與狄而不顧乃欲取商之土地以自王焉吾知太王斷不然也觀文王值紂方稔雖三分有二事殷如故猶不免羗里之難太



王之時何時也不敢蓄無君之心也明矣若泰伯當  
太丁帝乙之世安能朝諸侯有天下哉縱使足以王  
時勢在我而嗣位後祇守臣節以終身亦不失為讓  
商矣乃遠逃以成父翦商之志謂之固讓吾不知也  
然則泰伯不嗣周統孔子謂其三以天下讓何哉蓋  
泰伯仲雍季歷皆太王子也太王因季歷生文王知  
有聖德而欲傳之故泰伯順承父志與仲雍同窟荆  
蠻方其逃也以國讓之王季也厥後文王三分有二

武王克商遂有天下知泰伯以國讓耳孰知以天下讓哉故曰三以天下讓民無德而稱焉詩大雅曰帝作邦作對自泰伯王季維此王季因心則友則友其凡則篤其慶載錫之光受祿無喪奄有四方伯之讓季之友正謂此也若謂其不從太王翦商故為逃荆採藥之舉即以天下讓之商也人皆知之矣胡為乎民無得而稱也耶可見坤順承天臣道也子道也泰伯文王所以均之為至德也若曰父欲翦商而子不

從即為至德則周家自太王王季文王世世有圖商  
之志至武王始克遂也周之世德安在哉噫史傳記  
載豈特太王受誣已哉以文王事殷之至德乃曰西  
伯陰行善以武王順天應人之師乃曰武王至紂死  
所三射之躬斬其首懸於太白之旗其敢於誣聖人  
一至此哉是皆君臣大義所關不容不辯故併及之

無知

天地間凡有血氣之屬必有知故大學莫先於致知

也聖人乃云無知果謙已以誨人乎抑統言人心之  
虛體乎玩味上下語意皆是也亦皆非也何也人皆  
有此德性之知雖若炯然在中昭明有融實無形象  
可覩無方體可求故謂之為虛靈謂之如神明而知  
本無也人或守己之智識以盡天下之見聞或能反  
觀默照得常惺惺法固自以為有知爾非所以論聖  
人也茲以凡人擬度至聖將以為謙已歟然玩下文  
叩兩端而竭焉何自任也將以為統論心體之本然

玩上文吾有知乎哉則又自道其實焉此必當時因  
聖人誨人不倦叩竭兩端或以有知稱之故云無知  
語意渾涵徹上徹下雖謙而實自任雖若統論知體  
而實自道也不然誨由以知之為知之不知為不知  
只此是知也易曰乾知知至知終孟曰良知知愛知  
敬安得直謂之無哉况知體之在人也泥于識見則  
不通扭于方所則不盡又何敢自以為有知耶是故  
惟寂為能通天下之感惟虛為能待天下之動惟無

為能納天下之有天地且然況於人乎嘗觀諸天時  
物皆在其包涵徧覆中也然萬物異類矣並育不相  
害四時異候矣並行不相悖孰主張是哉易曰乾知大  
始乾以易知宜乎有知莫天若也而天之類族辨物  
其于卑高小大之等是非善惡之別犁然不爽雅云  
監觀四方頌云日監在茲孔子亦云知我其天而天  
之知終莫之窺焉天命本於穆也天載無聲臭也是  
天有知乎哉無知也而知始則悉歸諸天焉人獨異

於天乎故知一也在耳為聰在目為明在心為思為  
睿智也聲未接于耳聰與聲俱寂也然聽五聲者聰  
也雖既竭耳力隨其音響悉聽容之不清焉似乎聰  
有定在矣即此以反聽之聰則畢竟無可執也苟自  
以為聰執之以辯天下之聲則先已自塞其聰何以  
達四聰乎色未交于目明與色俱泯也然見五色者  
明也雖既竭目力隨其形貌悉詳觀之不吝焉似乎  
明之有定方矣即此以反觀之明則畢竟無可象也

苟自以為明執之以察天下之色則先已自蔽其明  
何以明四目乎思慮未萌睿智與事物而俱歛矣然  
神通萬變者思之睿也雖竭心思隨其事物以酬酢  
之而盡入幾微似乎睿智有所定矣即此以自反焉  
睿則畢竟無可窺也若自以為睿執之以盡天下之  
變則先已自窒其思何以無思無不通乎易曰天下  
何思何慮天下同歸而殊途一致而百慮天下何思  
何慮此之謂也夫遠而觀諸天之知大始近而觀諸



衆人何思何慮聖人無知之訓豈欺我哉可見無知  
云者如無適無莫一以義為適莫也無可無不可不  
以我為不可也無知無不知一隨鄙夫之問而叩  
竭兩端以為知其空空者自如也豈并德性良知而  
無之之謂哉噫惟其無知所以無不知也所以學必  
致知而為知之至者無之極也古今稱大智者必歸  
諸舜也好問好察執兩端而用中于民舜有知乎哉  
諒哉知本無也聖人天聰明之盡不能于知之本體

加毫末矣奈何執見聞知識自以為有知者無論已  
或欲并德性良知掃之以歸諸無是又不可以無辯

博文約禮

談聖學者莫不曰顏子没而聖人之道亡談顏子之  
學者莫不曰顏子深潛純粹終日如愚善發聖人之  
蘊爾已然稽諸論語孔子因其問仁而教之以克己  
復禮回之自叙亦曰博文約禮夫何言禮者又只以  
天理歸諸此心之虛寂而視節文儀度皆粗迹焉則

在聖人之學信亡于顏子之後矣樂記曰天高地下  
萬物散殊而禮制行焉臯陶篇曰天秩五禮自我五  
禮五庸哉中庸曰親親之殺尊賢之等禮所生也謂  
禮非天理不可也然經禮三百曲禮三千其等殺之  
森列品節之詳明謂非聖人之制不可然一皆原之  
天秩而其條理自不可紊也所謂復者復此也約者  
約此也顏子請事竭才卓然如有所立卓者莫非禮  
也或曰克己復禮子以禮為秩序等列之天則焉可

矣使文禮亦以此言之何以謂之約哉曰且以文字  
先發明之可乎彼以博文為先約禮為後截然分屬  
信不可也專以文為外以禮為內而判然以多寡分  
之可乎不可乎世儒只認詩書六藝為文者必欲多  
其見聞廣其訓詁一切歸諸典章史冊固失之記誦  
之末矣而必於視聽言動作止進退之際以為文止  
在乎一身則文猶人矣何躬行之未得而孝弟謹信  
又何必行有餘力然後學文哉彼四教有文行之殊

四科有德行文學之異則文不可專指動容也明矣  
易曰觀乎天文以察時變觀乎人文以化成天下所  
以伏羲仰天俯地近身遠物其博為何如哉若夫禮  
儀三百威儀三千似不可以約言矣而不知三百三  
千一皆此心天理之等列不可以一毫人力參也即  
如目之所視形色錯覩何其文也然五色不可淆而  
目中之條理孰非自然之禮乎耳之所聽聲響錯陳  
何其文也然五聲不可亂而耳中之條理孰非自然

之禮乎口之所言言論錯出何其文也然五音不可  
混而口中之條理孰非自然之禮乎身之所動事為  
錯行何其文也然五事不可紊而身中之條理孰非  
自然之禮乎以倫叙之酬酢用敬用愛何文如之而  
尊卑親疎當隆當殺莫非禮也經史之記載或言或  
行何文如之而賢否治亂當勸當懲莫非禮也天地  
萬物成象成形何文如之而高下散殊洪纖森列孰  
非禮乎自文言之嘉美會通是即文之禮也自禮言

之儀度品節是即禮之文也文乃禮之章施禮為文之條理由一心以達之兩間其文不可勝窮非博而何其禮不可踰越非約而何從心所欲而矩自不踰動容周旋而禮無不中博約一致所以為盛德之至也蓋觀諸水乎波瀾滌回其文渙然而千支萬派一皆其自然之川流也蓋觀諸木乎華實暢茂其文森然而千枝萬葉一皆其自然之木理也可見水之源源木之生生條理分明莫非天也不然道之以德可

謂約矣何為而齊之以禮知及仁守莊蒞可謂約矣  
又何為動之不以禮者猶未善乎噫三千三百一天  
秩也萬事萬物一天則也此之為天理此之謂禮之  
約善求顏子之學者甚毋認天理于虛寂之歸而博  
約一致其庶矣乎

先進後進

嘗誦孔子曰吾觀於鄉而知王道之易易也因觀蜡  
語子貢曰百日之蜡一日之澤非爾所知也一張一



弛文武之道也又畢蜡出遊觀上而嘆語言偃有曰  
大道之行也與三代之英丘未之逮也而有志焉夫  
鄉飲酒禮與蜡祭之禮皆禮行于鄉者也孔子何為  
而有取于鄉之禮乎因有感而嘆曰此孔子所以從  
先進也此所以禮失求之野猶有古人遺意在也不  
然孔子嘆魯之郊禘非禮至不欲觀曰我觀周道幽  
厲傷之又曰周公其哀矣夫國家之禮莫大乎郊禘  
乃哀周道之衰蜡與鄉飲酒禮乃志三代之英而嘆

王道之易易此其意蓋可識矣夫禮樂一也無分于古今無分于上下無分于鄉國者也此可論於三代盛時而敝流叔世則有大不然者故論語曰先進之於禮樂野人也後進之於禮樂君子也如用之則吾從先進自今觀之先進後進以時言也如註中前輩後輩是也野人君子以分言也即愛人易使之君子小人是也不曰小人而曰野人以地言也野人散居都鄙鄉井其于禮也樂也不免粗鄙朴陋之習而古

先餘風猶有存焉者此其前輩之所尚乎君子聯聚  
于朝宁城邑其于禮樂也華麗便習燦然可觀乃今  
時之所尚者此非後輩之所行乎由今日較之春秋  
固時異世殊而以今日習俗言之或與春秋時亦不  
大相懸絕凡今之有識者莫不嘆後輩之澆漓思先  
輩之質朴孔子先進之從想亦同此意歟蓋郊野之  
人耕而食鑿而飲晝于茅夜索絢胼胝手足勞苦其  
筋力凡侈靡之習非惟不能且不暇亦且耳目見聞

有不及也故衣冠飲食之間語言揖讓未免質直儉  
嗇過于簡畧然禮以節民而節之之意未盡壞樂以  
和民而和之之意未盡流司世教者有能舉而用之  
則一變可至于道矣况野則野矣大朴未散本真尚  
存忠信之人可以學禮所以先進之禮樂為可用也  
若夫城邑固聲名勢利之場縉紳士大夫又皆文物  
相競之會褻襲升降濟濟蹒蹒承順應對唯唯諾諾  
聲音笑貌之間莫不可觀而可聽也後進之於禮樂

若此孰不以為彬彬郁郁舍君子而誰此所以不有  
祝鮀之佞而有宋朝之美難乎免於今之世也然巧  
言令色足恭左丘明恥之矣脅肩諂笑病於夏畦曾  
子傷之矣文華大勝本實先撥至求之玉帛鐘鼓不  
愈失而愈遠哉如或用之自一身以及一家一鄉一  
邑一國至四海之廣雖欲不從乎先進不可得矣所  
以孔子論禮樂之本則曰禮與其奢也寧儉喪與其  
易也寧戚論奢儉則曰與其不孫也寧固孰非從先

進之意歟可見先進本質樸也後進本華美也何必  
添今人反謂之為野人反謂之為君子哉或曰周尚  
文故孔子一則曰郁郁乎文哉吾從周一則曰吾學  
周禮今用之吾從周此固為下不悖之義亦周監二  
代之得宜也于此乃曰如用之則吾從先進夫野則  
不文矣從周顧如是乎蓋先進於禮樂乃文武成康  
之舊野人尚未失其初也後進乃周末文勝之流弊  
君子競趨之靡固至此耳先進是從豈變禮易樂哉

今之禮猶古之禮今之樂猶古之樂特今之人非古  
之人也前輩後輩用禮樂不同耳孔子從先進正以  
從周之盛時也噫傷今思古聖人欲挽風會之流而  
不可得至斟酌四代禮樂又曰放鄭聲遠佞人亦將  
以救後進之流弊歟

克己由己

執中虞庭之宗旨也既曰人心惟危矣又曰道心惟  
微是果有二心乎求仁孔門之宗旨也既曰克己復

禮為仁又曰為仁由己是果有二己乎哉心一也而有人心道心之分己一也而有克己由己之辯差毫釐繆千里不可不慎也譬之同一刃也本以防盜而以之劫掠斯為盜矣取盜之刃以防盜即非盜矣是故人受天地之中以生而幾微即道心也但有是人之形即有是形骸之欲苟心為形役則危矣惟不從乎人心之危是即道心之微而精一執中在是也仁者人也本無己之可克也但有是人之形即易狗乎



一己之私苟己私一勝不容以不克矣惟能克乎軀  
殼之己是即天性之真己而已克禮復仁在是也可  
見仁即人也即所謂人受天地之中以生純乎天理  
而無一毫人欲之私者也天理非禮乎人欲非己乎  
克己即復禮復禮即為仁此所謂為仁由己也一也  
仁則可以為人不仁則不可以為人故己一也克己  
即復禮而為仁己不克則禮不復不可以為仁矣又  
何疑哉嘗謂克己斯能由己由己斯為真克己幾微

之間不可不早辯也或曰克己斯為由己是矣亦必克去淨盡而後處處皆真己運用乃為由己此亦未易能者殊不知我欲仁斯仁至矣曾有欲仁而仁不即至者乎有能一日用其力於仁矣乎我未見力不足者曾有一日用力于仁而力不足于一日者乎若曰姑待明日便非善用力者矣便非真克己矣是故人孰無欲凡欲食欲色皆欲也一刻轉念而欲乎仁則此即純乎天理而仁與欲俱至矣然則欲仁之欲

與欲食色之欲一乎二乎特視所欲何如耳人孰無力凡用力于貨利皆力也一刻反已而用力于仁則渾身純乎天理而仁與力俱足矣然則用力于貨利與用力于仁之力一乎二乎特視所力何如耳況食色貨利皆外物也求之不以為難而何獨難于克復之功哉或曰一日克復固由乎已而天下歸仁則存乎人其能必之於一日耶殊不知天下同此人也同此純乎天理之仁也本自天下一家本自中國一人

本自萬物一體人人具足不由外鑠不容一毫人力以增損之者惟一日克己復禮則己不逞乎血氣己不措于形骸一日之間即能天下為一家中國為一人萬物為一體八荒皆我閭闔四海皆我度內而天下不其歸仁矣乎是故仁即無我之謂無我則自有條理而親親仁民愛物取之吾心裕如也不仁有我之謂也有我則為軀殼視至親如路人矣去其有我之私即為無我之體消其一己之欲即同天下之心正

所謂仁者己欲立而立人己欲達而達人而天下人之立達皆由己以立達之則歸仁之機可識矣或曰非禮即己也必於視聽言動上克之何歟蓋人之一身除却耳目口體則無所謂己矣而不知形色天性也視所當視聽所當聽言所當言動所當動何一非禮也但其視也必欲快己之目其聽也必欲快己之耳其言動也必欲快己之口體而已之耳目口體反為外物所奪矣謂之由己可乎以己之耳目口體不

得自由是可以為人乎人之不仁職此故也所以為  
仁之功不必遠求惟于耳目口體之間凡有一毫之  
非禮者勿視勿聽勿言動焉則心不為形骸所牾而  
廓然無我矣非仁而何信乎克己斯為由己而已即  
仁也不陷于人心之危即為道心之微而道心即中  
也一翻覆手而陰陽分也識仁者其慎辨之

下學上達

孔子自十五志學以至七十從心所欲不踰矩無一

日而不盡其下學之功亦無一日不得夫上達之妙也所謂下學者何自其致力處言也所謂上達者何自其得力處言也未有能自致力而終不得力者又豈有得力而不由于致力者乎雖工夫之初進或用功多而得力尚少惟工夫進進不已則日見其熟致力即已得力而未敢自懈其力焉嘗自日用觀之時其飲食猶之下學也飲食之變化以滋養血氣猶之上達也飲食之變化滋養雖非人之所能與亦非人

之所能强者而節宣飲食之多寡惡可以一日而忽之哉孔子十五志學即志此下學上達之學也從心所欲不踰矩雖其上達非常情所能窺測而其下學之功則未嘗一日少懈故其言曰其為人也發憤忘食樂以忘憂不知老之將至斯言也孔子豈欺我哉或者又以孔子聖由天縱生而知安而行自上達乎神化性命之奧而學知何足以盡孔子之神明也是皆常人觀聖人也若孔子則曰聖則吾不能我學不



厭教不倦也。豈特不以聖自居且曰君子之道丘未能焉。惟言有餘不敢盡行，不足不敢不勉，而其下學也有如此，故其上達。肫肫而言行相顧者，即此乎在也。然則聖人果下學人事上達天理乎？蓋天下無理外之事，亦無事外之理也。猶夫農之于五穀焉，耕耘收穫皆人事也。苗秀花實皆天理也。吾惟盡吾耕耘收穫之事，而自具夫苗秀花實之理，即此下學即此上達，無時無處而不下學，亦無時無處而不上達，如

此而分人事天理無不可者若人事天理分為兩截或以人事已畢然後上達皆不可也要非聖人有意以合之也道一而已矣精粗一致上下一原道之自然而然者也聖人一循其自然而不敢參之以一毫智識意見此所以下學自然上達吾惟節吾之飲食而血氣自充吾惟勤吾之耕播而苗生自盛由少至老不敢一息懈此所以不怨不尤而聖益聖也况堯舜以上善無窮則是上達者無窮而下學者又豈有

窮盡哉雖然下學上達道本合一而知我其天則天人合一者不即此可以窺之哉今夫天行健自開闢以來未嘗一日息也惟其行健而不息所以資始資生絪縕化醇之無窮者自在其中也然則孔子之下學一天之行健而不息乎孔子之上達一天之絪縕化醇而生物之不測乎信乎知我其天而莫我知也但孔子于莫知無言之嘆每援天以曉子貢想亦因其庶幾性與天道而以是語之乎觀天階之喻則其

智足以知聖人也端有自矣

請討

名分莫大乎君臣罪惡莫大於弑逆思以有道易無道而天下有大逆不道者不思倡大義以討而誅之仁人之心能一日安乎哉惟仁人之心不忍天下無道之甚至于無君故討賊以明天下大分其于賊之能討與否卒阨于時勢之不齊焉非所論也况弑逆之賊人人得而誅之不論其鄰與不鄰在位不在位

苟有能興義旅以討之者雖出自匹夫賤役而其大義已伸于天下矣又豈必真能執其賊而誅之哉人臣無將將則必誅凡普天率土有能正其名定其罪聲言以倡義舉則天理在人心激之即動倡之必和雖奸邪跋扈中藏不軌者一聞斯言亦將褫其魄而落其膽矣所以忠臣義士其動舉若不過一節之微而其義有關於宗廟社稷綱常之重者每每使天常人紀既墜復振雖百世之下聞之且凜凜有生氣焉

正以名義足以肅人心也觀唐肅宗播遷在草萊中  
悍將背闕而坐及李勉一彈劾之乃嘆曰吾有李勉  
一言足以尊朝廷而倡言討弒逆者其義關綱常當  
何如哉陳恒弒君天下之大變也孔子沐浴請討扶  
植綱常之大義也大凡仁人處無道之世其心已有  
大不忍者弒君之賊又法所必誅也孔子時在魯也  
雖欲不請討于魯其中端有不容已者矣左氏記孔  
子之言曰陳恒弒其君民之不與者半以魯之衆加

齊之半可克也謂此非孔子語由其以力不以義是也胡氏曰仲尼此語先發後聞可也蘇子瞻曰哀公患三桓之偏嘗欲以越伐魯而去之以越伐魯豈若從孔子伐之既克田氏則魯室自張三桓將不治而自服此孔子之志也子曰齊桓雖中主然其所以任管仲者世無有也然後九合之功可得而成今哀公之懦非可以望桓公也使孔子誠克田氏而返將誰與保其功程子曰若孔子之志必將正名其罪上

告天子下告方伯而率與國以討之即數子之言程  
子近之矣要皆以智謀測度聖人之作為也何也哀  
公之懦三桓之強不足與有立也孔子知之素矣知  
其不可與有立而不之請聖人不忍也好謀有成以  
戰則克孔子餘事耳而事求成一一如蘇胡諸家之  
計畫聖人有不為也不知孔子聖之時也天下無道  
思以易之此其仁天下之心未嘗一日忘而女樂一  
受雖魯國幾治弗顧也時乎天下有大逆不道如陳



恒者沐浴請討乃其大義之不容已者矣若或義師  
一動由此可以勝齊可以強魯可以興周其神妙固  
非後人所能窺測而計功之心諒聖人所必無也已  
是故孔子請討陳恒只此一舉倡之魯庭當時君臣  
之大義已明載之魯論萬世君臣之大分已肅不必  
擬議其神筭為何如成功為何如而天理在人心者  
已覺而醒矣真若天地生萬物而天下雷行物與無  
妄化工之妙孰得而思議之哉雖然天地之造化固

非人所能擬而無妄之在物者又未嘗因雷霆有所  
加聖人之化工固非衆人所能窺而大義之在人者  
亦未嘗因聖人有所益然雷霆之震驚聖人之舉動  
其神功自有在也故曰孔子修春秋而亂臣賊子懼

為東周

孔子夢寐周公志欲行周公之道也周公之道何道  
哉文武之道也二帝三王得以其道君天下周公不  
過相天下耳然大君天地之宗子大臣宗子之家相

君相握天下之權總天下之政行其道以澤民利物  
致太平也一而已矣西周之盛周公親致之身親見  
之二帝三王之行于昔者行于西周之盛時思兼之  
心想無遺憾矣自今觀之監二代之典章頌一王之  
制度體國經野設官分職文謨武烈之精遍乎寰宇  
關雎麟趾之意浹洽民心薄海內外罔不率從俾皞  
皞乎天地太和之氣盎溢于西周宇宙間也此即堯  
舜禹湯文武之心堯舜禹湯文武之道而周公行之

矣不特成康之世治隆化洽刑措不用自幽厲以前  
天下同文同軌而周公之澤尚流被無窮迨平王東  
遷周道凌夷禮樂征伐之權不自天子出至下堂見  
諸侯矣雖賴周公僅存之烈而列國尚知宗周未敢  
改物易姓然問鼎請隧射王中肩者莫敢誰何天子  
亦徒擁虛器于上耳回視西周盛際曷能已于黍離  
之憂下泉之愴歎哉故詩曰誰將西歸懷之好音曰  
彼美人兮西方之人兮以意逆志其哀東周衰弱亦

至矣此孔子所以志欲行周公之道而夢寐不忘欲  
挽其衰以還其盛也觀其終身煖席不暇皇皇焉若  
求亡子于道路豈得已哉此其心直欲以老安少懷  
之志見諸行事之實朞月而可三年有成庶幾海宇  
黎庶復覩西周衣冠文物之盛焉則周公之道于是  
乎行孔子之心于是乎少慰也奈何天下莫宗而卒  
老于行及公山弗擾以費叛召之欲往其往與不往  
不可測但欲赴叛人之召其大不得已之心蓋可想

矣子路不悅乃曰吾其為東周乎夫東周之規模氣象為何如者乃肩為乎此耶今即其辭氣以會其意正言其不為東周耳不為東周則必為西周之盛可知也孔子一出而用于世即可使天下復如西周則周公之道既以復行斯世斯民得悉被乎唐虞三代之澤又如之何必欲潔身山林不思一出以為之兆乎且召則能加之以禮即其良心亦真知聖人而能授之以政矣所以孔子知天下無不可化之人亦無

不可為之時而語皆實語也觀他日欲往佛肸之召不甘為匏瓜之繫亦此意也深厲淺揭安足以識孔子之心哉至如東周君弱臣強以下凌上公山畔費正坐此弊即其不為東周其不往公山亦自可見而其心亦戚矣嗟夫讀孔子之書當觀孔子之心也但欲以有道易無道孔子之心未嘗一日忘天下然當時如沮溺楚狂丈人之流且不足以語此後儒又謂孔子欲為東周是孔子之心其終于不白矣乎孔子

之心不白于當時又不白于後世志孔子之道者惡容已於言哉或曰孔子非助畔之人彼豈不知而敢于來召者必有道存焉蓋費乃季氏私邑三家分據魯國故陪臣欲張公室畔季氏將以強魯也所以謂之召我豈徒哉此亦一說也

執中

民受天地之中以生是中也天之所以為天即民之所以為民也聖人代天子民舍中奚以哉是故執中



之傳不徒徃聖絕學此其繼之實為天地立心生民  
立命而萬世太平一脉于此乎繫也夫天高高在上  
民生其間若不足為重輕况自天子視之其分又若  
此乎卑且賤矣孟子謂民為貴君為輕豈輕君而貴  
民哉得乎丘民為天子正以民心即天心也得民得  
天揭其要不過曰中而已矣論語末篇歷叙二帝三  
王本之典謨誓誥觀堯曰咨爾舜天之歷數在爾躬  
允執其中四海困窮天祿永終夫天子膺上天歷數

以統攝四海之民執中亦足以合天矣然民受天地之中以生苟四海困窮民皆不獲遂生復性謂之允執中也可乎哉此所以天祿永終謂不能安養上天所生之民即不克負荷上天之歷數而中之有關於天民也如此堯以此命舜舜以此命禹三聖相授受儆戒叮嚀若是其諄切者中之外無餘蘊也所以湯執中而惟上帝之祗也曰萬方有罪罪在朕躬武建中而畏上帝之臨也曰百姓有過在予一人惓惓乎

以罪過反諸己匹夫匹婦時切勝予之念惟恐辜上天歷數而此心有不容自己者在也故仲虺之誥曰惟天生民有欲無主乃亂惟天生聰明時乂秦誓曰惟天惠民惟辟奉天真有見乎天人一體而湯武善承堯舜禹執中之傳者此也順天應人易豈虛語哉不然揖遜放伐傳賢傳子若是乎不齊而允執厥中胡為乎後先一揆也後之君天下者莫不希名禪讓比迹征誅求如二帝三王以天地生物之心為心而

用中于民者誰歟中也者天下之大本也人君不能  
濟美帝王非其揖遜放伐不相似也不能體天心立  
民命則大本不立惡足以望唐虞三代之盛哉或曰  
上帝作之君師而學必執中于以家四海子萬民何  
與哉蓋人之生也受中天地自天子至庶人一也故  
曰仁者天地之心苟不能視萬物為一體天下為一  
家中國為一人未免隔藩籬分汝我視至親猶路人  
且不可以語人也况生民以來未有之孔子耶觀其

皇皇然必欲以有道易無道以求遂老安少懷之心  
是心也即堯舜禹惟恐四海困窮之心也即湯武萬  
方百姓罪在一人之心也即大學欲明明德于天下  
中庸盡性參贊天地之化育也論語以此終篇意亦  
微矣孟子叙聞知見知以堯舜湯文孔子並列韓退之  
叙堯舜禹湯文武周公孔孟之相傳皆此意也奈何  
此學不明遂指中為寂體止觀收視返聽默照圓通  
以為秘密自私自利四大之外漠然不相關舉天下

溺虛寂之見何怪乎聖學之不昌耶雖然道本一而  
二之非道也學本一而二之非學也明德親民中和  
位育一以貫之者也古之學出于一貴賤一也治教  
一也窮達一也人我一也內外體用費隱寂感一也  
此人心所以正世道所以隆也後之學出于二貴與  
賤殊治與教殊窮與達殊人與我殊內外體用費隱  
寂感一切岐而二之此人心所以邪正道所以汚也  
何也人受天地之中以有生無二中也二之自絕于

天自戕其命也志執中之學者惟潛神堯曰篇久久當自得之

學大學叙

嘗讀易見孔子以大贊乾知大始故也然乾之所以知大始者非即在人之明德乎易知則有親非即明德之必親民乎由此有親有功可久可大易簡而天下之理得矣非即知止而自然定靜安慮得乎此學之所以為大也然欲明明德於天下而推其功之所

先必先乎致知格物何哉乾陽物也坤陰物也真信得乾坤無形體而亦謂之物則格物之義明矣是故易九卦有曰復德之本也復以自知復小而辨於物會而通之物有本末物格而後知至此謂知本此謂知之至也又何待辯哉噫物即至善之止復見天地之心而壹是皆以修身為本但止即止其所復修即修其所止此之謂先天之學



大

學

大學章句

朱子定

聖經一章傳十章

大學古本

王陽明先生

復總只一篇

子程子曰大學孔氏之遺書而初學入德之門也於今可見古人為學次第者獨賴此篇之存而論孟次之學者必由是而學焉則庶乎其不差矣

大學章句序曰大學之書古之大學所以教人之法也蓋自天降生民則既莫不與之以仁義禮智之性矣然其氣質之稟或不能齊是以不能皆有以知其性之所有而全之也一有聰明睿智能盡其性者出於其間則天必命之以為億兆之君師使之治而教

之以復其性此伏羲神農黃帝堯舜所以繼天立極而司徒之職典樂之官所由設也三代之隆其法寢備然後王宮國都以及閭巷莫不有學人生八歲則自王公以下至於庶人之子弟皆入小學而教之以灑掃應對進退之節禮樂射御書數之文及其十有五年則自天子之元子衆子以至公卿大夫元士之適子與凡民之俊秀皆入大學而教之以窮理正心修己治人之道此又學校之教大小之節所以分也

夫以學校之設其廣如此教之之術其次第節目之  
詳又如此而其所以為教則又皆本之人君躬行心  
德之餘不待求之民生日用彝倫之外是以當世之  
人無不學其學焉者無不有以知其性分之所固有  
職分之所當為而各俛焉以盡其力此古昔盛時所  
以治隆於上俗美於下而非後世之所能及也及周  
之衰賢聖之君不作學校之政不修教化陵夷風俗  
頹敗時則有若孔子之聖而不得君師之位以行其

政教於是獨取先王之法誦而傳之以詔後世若曲禮少儀內則弟子職諸篇固小學之支流餘裔而此篇者則因小學之成功以著大學之明法外有以極其規模之大而內有以盡其節目之詳者也三千之徒蓋莫不聞其說而曾氏之傳獨得其宗於是作為傳義以發其意及孟子沒而其傳泯焉則其書雖存而知者鮮矣自是以來俗儒記誦詞章之習其功倍於小學而無用異端虛無寂滅之教其高過於大學

而無實其他權謀術數一切以就功名之說與夫百家衆技之流所以惑世誣民充塞仁義者又紛然雜出乎其間使其君子不幸而不得聞大道之要其小人不幸而不得蒙至治之澤晦盲否塞反覆沈痼以及五季之衰而壞亂極矣天運循環無往不復宋德隆盛治教休明於是河南程氏兩夫子出而有以接乎孟氏之傳實始尊信此篇而表章之既又為之次其簡編發其歸趣然後古者大學教人之法聖經賢

傳之旨粲然復明於世雖以熹之不敏亦幸私淑而與有聞焉顧其為書猶頗放失是以忘其固陋采而輯之間亦竊附己意補其闕畧以俟後之君子極知僭踰無所逃罪然于國家化民成俗之意學者修己治人之方則未必無小補云

右傳之十章釋治國平天下凡傳十章前四章統論綱領指趣後六章細論條目工夫其第五章乃明善之要第六章乃誠身之本在初學尤為當務之急讀

者不可以其近忽之也

大學古本序曰大學之要誠意而已矣誠意之功格物而已矣誠意之極止至善而已矣止至善之則致知而已矣正心復其體也修身著其用也以言乎已謂之明德以言乎人謂之親民以言乎天地之間則備矣是故至善也者心之本體也動而後有不善而本體之知未嘗不知也意者其動也物者其事也致其本體之知而動無不善然非即其事而格之則亦



無以致其知故致知者誠意之本也格物者致知之實也物格則知致而有復其本體是之謂止至善聖人懼人之求之於外也而反覆其辭舊本折而聖人之意亡矣是故不務於誠意而徒以格物者謂之支不事格物而徒以誠意者謂之虛不本於致知而徒以格物誠意者謂之妄支與虛與妄其於至善也遠矣合之以敬而益綴補之以傳而益離吾懼學之日遠于至善也去分章而復舊本傍為之什一以引其

義庶幾復見聖人之心而求之者有其要噫乃若致知則存乎心悟致知焉盡矣

大學問曰大學者昔儒以為大人之學矣敢問大人之學何以在于明明德乎陽明子曰大人者以天地萬物為一體者也其視天下猶一家中國猶一人焉若夫間形骸而分爾我者小人也大人之能以天地萬物為一體也其心之仁本若是其與天地萬物而為一也豈惟大人雖小人之心亦莫不然彼顧自小

之耳是故見孺子之入井而必有怵惕惻隱之心焉  
是其仁之與孺子而為一體也孺子猶同類者也見  
鳥獸之哀鳴殫觫而必有不忍之心焉是其仁之與  
鳥獸而為一體也鳥獸猶有知覺者也見草木之摧  
折而必有憫恤之心焉是其仁之與草木而為一體  
也草木猶有生意者也見瓦石之毀壞而必有顧惜  
之心焉是其仁之與瓦石而為一體者是其一體之  
仁也雖小人之心亦必有之是乃根于天命之性而

自然靈昭不昧者是也故謂之明德小人之心既已  
分隔隘陋矣而其一體之仁猶能不昧若此者是其  
未動于欲而未蔽于私之時也及其動於欲蔽於私  
而利害相攻忿怒相激則將戕物圯類無所不為其  
甚至有骨肉相殘者而一體之仁亡矣是故苟無私  
欲之蔽則雖小人之小人心而其一體之仁猶大人也一  
有私欲之蔽則雖大人之大人而其分隔隘陋猶小人  
矣故夫為大人之學者亦惟去其私欲之蔽而自明

其明德復其天地萬物一體之本然而已矣非能於本體之外而有所增益之也曰然則何以在親民乎曰明明德者立其天地萬物一體之體也親民者建其天地萬物一體之用也故明明德必在於親民親民即所以明其明德也是故親吾之父以及天下之父而後吾之仁實與吾之父人之父與天下人之父而為一體也實與之為一體而後孝之明德始明矣親吾之兄以及人之兄以及天下人之兄而後吾之

仁實與吾之兄人之兄與天下人之兄而為一體矣  
實與之為一體而後弟之明德始明矣君臣也夫婦  
也朋友也以至為山川鬼神鳥獸草木也莫不實有  
以親之以達吾一體之仁然後吾之明德始無不明  
而真能以天地萬物為一體矣夫是之謂明明德於  
天下是之謂家齊國治而天下平是之謂盡性曰然  
則又烏在其為止至善乎曰至善者明德親民之極  
則也天命之性粹然至善其靈明不昧者皆其至善

之發見是而是焉非而非焉輕重厚薄隨感隨地變動不居而亦莫不自有天然之中是乃民彝物則之極而不容少有議擬增損於其間也少有議擬增損於其間則是私意小智而非至善之謂矣自非慎獨之至惟精惟一者其孰能與于此乎後之人惟其不知至善之在吾心而用其私智以揣摩測度於其外以為事事物物各有定理也是以昧其是非之則支離決裂人欲肆而天理亡明德親民之學遂大亂于

天下蓋普之人固有欲明其明德者矣然惟不知止于至善而騁其私心於過高是以失之虛罔空寂而無有乎家國天下之施則二氏之流是矣有欲親其民者矣然惟不知止於至善而溺其私心於卑瑣是以失之權謀智術而無有乎仁愛惻怛之誠五霸功利之徒是矣是不知止於至善之過也故止至善之於明德親民也猶之規矩之於方圓也尺度之於長短也權衡之于輕重也故方圓而不止於規矩爽其



則矣長短而不止于尺度乖其劑矣輕重而不止于  
權衡失其準矣明明德親民而不止于至善亡其本  
矣故止於至善以親民而明其明德是之謂大人之  
學

大學原只是一章書無所謂經無所謂傳也亦無所  
從缺無所從補也蓋其書從頭至尾只是反覆詳明  
以顯大人之學其初說明明德親民當止諸至善如  
一破題相似却即接連說但能知至善所當止則其

意自定其心自靜其身自安以慮家國天下而自得  
其平矣此與箇承題相似却亦只是反說以見明親  
當止至善也於是又申明如何是當止之至善蓋明  
親這箇物事其末終貫徹天下而其本始却根諸身  
心此是一定格則先知得停當然後做得停當惟古  
之欲明明德於天下者能如是焉所以身心家國無  
不停當而為明親之善之至也又決言自上至下既  
皆以修身為本而後停當若本亂且薄則決無停當

之理所以必知本乃謂知至善也此却如小講相似亦不過將明親止至善衍說一遍至所謂誠其意者以下則如一大講逐件物事詳細條陳一段格則而格則最停當處則俱指示以淇澳等詩帝典等書又即是以古之明明德於天下者為至善也推之如所謂正心修身所謂齊家治國平天下直至此謂國不以利為利而以義為利也總是每件物事與他一箇至善格子而學者所當知者也則一章書首尾原自

相應亦自完全何容補湊

天地之大非徒大以形也欲窺天地之所以大者當窺其大生之心聖學之大必有大之實也欲求聖人之所以大者當求其大學之道大學一書既曰孔氏之遺書而孔門之學脉果何在乎亦曰仁而已矣天地之大生非仁乎曾謂大學之宗旨而有外于天地萬物一體之仁乎讀其書究其旨當自得之矣是故揭大學之道固在明明德親民止至善而約之以知

止矣則知止其要也定靜安慮得自將馴致于涵養  
中也而至善之當止豈出於事物之外哉物有本末  
事有終始知所先後則近道矣蓋於古之人而求之  
學主於明明德而親民正所以明其明德也故欲明  
明德于天下必先于治國齊家修身正心誠意致知  
格物如此而知所先格物而後知至意誠心正身修  
家齊國治天下平如此而知所後而一是皆以修身  
為本又約之以知本斯為知之至矣知本知止知所

先後也學豈有二宗乎夫知即明德致知即明明德也既曰知止又曰知本何也至善者至人固有之天則雖萬物之咸備實一物不可加是物原至善也但有本末存焉真知本之所在則物格而知止矣即修身為本一語觀之謂身為本則國家天下為末明矣身為本家國天下為末則所謂物者即身家國天下同為一物明矣身為物本家國天下為物末則所謂知本為知之至者即知身為家國天下之本乃所謂

知之至也又明矣況有是天下國家身心意知之物  
即有是格致誠正修齊治平之事而本末終始先後  
又何待言哉然則身之為物也存之為心意知達之  
為家國天下浩浩乎天地同流民物胞與本無窮盡  
本無間隔孔孟所謂仁者人也形色天性也皆是物  
也其本末厚薄雖各有等殺而一皆天生蒸民之物  
則也何如其至善哉夫人同是物而必欲格之何也  
非於物有所加也是以陽明先生謂良知祇用安排

得此物由來自渾成苟欲致吾至善之知全吾明德之體惟工夫即本體本體即工夫不敢以一己智識亂其知本之明而一順乎帝則是也既知身即公好公惡之本由是隨所應感一惟毋自欺以慎其獨焉斯已矣所以曾子傳大學深致嚴于斯也誠意之君子惟能如好好色如惡惡臭而德潤身焉則自心身以達之家國天下忿懣恐懼好樂憂患不滯於有所親愛賤惡畏敬哀矜傲惰不溺於一偏有諸已而後



求諸人無諸己而後非諸人而仁讓興於國民之所  
好好之民之所惡惡之而絜矩于天下要皆此物格  
而止至善也故曰惟仁人能好人能惡人夫前言慎  
獨而獨即矩也後言絜矩而矩即獨也皆此至善之  
物而異其名焉耳徵諸詩書如堯湯文武武公之學  
夫豈有二道哉然親民以明其明德而約之於知止  
格物以致其知而約之於知本信乎學無二道矣所  
以修身為本而自明自修若不過一人之身耳謂之

為大學之道者正以人皆有不忍人之心而原非形骸之所能隔則此身豈小物哉故明德非一於內也即天下國家統會於吾身之心意知而自不容間者也親民非一於外也即吾身之心意知貫徹乎天下國家而自不容已者也知有一毫之不至意一毫之不誠心一毫之不正固不可以言身之修而天下國家漠然與我不相關且視天親猶途人也可以言修身乎是故知吾身之非小則知聖學之本大彼徒事

於格致誠正而不知親民者是二氏之自私其身也  
徒事於齊治均平而不知明明德者是五霸之自遺  
其身也皆不可以語仁也大學之宗旨不明於後世  
也有由然矣夫知修身為本而天子與庶人一者何  
哉位有崇卑學無小大堯天子也堯明峻德以漸致  
親睦平章協和之化其仁固如天矣孔子庶人也已  
欲立而立人已欲達而達人老安少懷不厭不倦亦  
何異於堯也後之人皆知宗孔子之學而惡可以庶

人自誣耶雖然孔子十五志學即所謂欲明明德于天下是也人孰無所欲哉果有志於大學之道我欲仁斯仁至矣

天之生人有物焉完具於其身至善也至善無物也而有本末不得不謂之物無物而萬物備也知其靈覺也意其生意也意原於知而其端甚微道心惟微也吾身之所以為本也天下國家皆末也本始皆統原于一本而其實一物也屬之於為故謂之事格致

誠正修齊治平是也明明德于天下事之終也而欲  
明明德即為始事致吾之知在止于至善之一物者  
事之始也而知至知終同為一知有終始而其實一  
事也事不離物物不離事知所先後學之道也是以  
下者自天子以至庶人壹是皆以修身為本先本而  
後末厚本而薄末未有外其身而為天下國家者也  
必以修身為本謂之知本非苟知之實能至之是謂  
知之至也至斯止矣不至則不止不慎則不至知之

至其為慎獨乎獨即本也本即至善也天之命也藏之至寂而發之至微微之顯誠之不可掩也其動而後有不善者不慎故也慎則何不善之有

大學大旨

問大學古本悉遵王文成公表章是矣然前云明明德親民止至善而當知所止矣復云事物之先後何也曰前三在舉其槩後六先推其詳蓋天下國家身心意知總是明明德親民然雜施不遜獵等無序可

乎故自欲明明德於天下歷推其所先莫先致知矣  
致知在格物正所謂知止至善也問明德與知明明  
德與致知果不同乎曰姑即明與知之字義分別之  
明其知之全體知其明之發竅雖謂明為體知為用  
亦可也明之則無所不通致則隨所發竅推而廣之  
以要其極也問文成謂親民正以明明德也或問中  
發揮仁者以萬物為一體至精切矣然明德知也一  
體之親仁也會謂知即仁乎曰明德一也知仁皆明

德之別名耳蓋人心明覺未有不知痛癢者醫家以手足癢痺為不仁謂不自知其痛癢也孰謂明覺親愛有二乎哉試觀孩提之良知未有不知愛其親者大人特不失乎赤子之心耳問明明德親民固體用一原然必親民而後謂之自明歟曰非有意以致其親也記云凡生天地之間者有血氣之屬必有知有知之屬莫不知愛其類况有血氣之屬者莫知於人乾父坤母民胞物與原來國家之民皆是一體之親



亦因其本親而親之耳問明親無二孔子於知人愛人發之矣他亦有所證乎曰易繫謂乾知大始乾以易知易知則有親有親則可久孰謂人道非天道乎問明德外無至善又謂學有知止為急務而止至善外復有定靜安慮何也曰至善即明德之本體所謂天然自有之則不待人力安排即朱子所謂盡乎天理之極而無一毫人欲之私是也果能知止乎天理之極則漸漸定靜安慮實有諸已而能得矣問物猶

事乎致知在格物與知止至善一乎二乎曰天下國  
家身心意知一物也有是物即有是格致誠正修齊  
治平之事是物也有物必有則本至善也世有致知  
而不止乎至善之物則故凡致力于國家天下者有  
似于親民而昧乎物之本致力于身心意知者有似  
于明明德而不可以治天下國家要皆出乎智見之  
安排而不能格乎物耳問物格則知至知至則止至  
善矣又謂之知本何也曰物有本末而身為物本苟

徒明義理建事功而身不足法亦末矣故云自天子  
以至於庶人壹是皆以修身為本其本亂而末治者  
否矣真能知修身為本者此謂知之至也非即物格  
知至之謂乎問既云知止又云知本知至何也曰至  
善原于天修身存乎人知本而不知止固失其本然  
之天則知止而不知本又失其當然之人功惟知止  
至善而一本之修身焉盡之矣

問欲明明德於天下果欲使天下之人皆有以明其

德乎曰真信得體用一原人我無間如此說亦是蓋  
已欲立而立人已欲達而達人即欲仁是也況可欲  
之謂善苟不欲明明德於天下又何以止至善乎問  
孔子十五志學直至七十始從心所欲不踰矩何可  
遽責之初學耶曰格物正以滿乎此欲之量耳子以  
物之大而格之難乎夫所惡于上即明德中所同有  
者毋以使下即親民也推之上下左右前後莫不皆  
然始焉已所不欲勿施于人終焉從心所欲不踰矩

而止至善矣

問文成謂大學之要致知焉盡矣而格物之旨在格  
其不正以歸于正然歟曰窮至事物之理固懼其偏  
于外矣意之所在為物如意在事親則事親為一物  
意在忠君則忠君為一物得無懼其偏于內乎夫是  
物也原不可以有無內外精粗截然二之也但二先  
生雖各有定說然知性格物之謂非朱子之言乎良  
知抵用安排得此物由來自渾成非王文成之言乎

合二先生之言觀其會通格物之旨了然矣

問談名理止至善極矣下文乃舉事物言之果恐人之涉虛見乎曰人莫不云這物事不過舉有形象者謂之物舉逐日幹辦者謂之事而天下國家身心意知總謂之物格致誠正修齊治平總謂之事誰則知之物事自有本末終始先後要在重本始急先務誰則知之若終生只此一事一物而物格止至善尤難知也所以謂之大學本在修身先在格物

問修身為本之本果不對末言乎曰天之生物使之  
一本安得有二本也惟不信格物之物即物有本末  
之物故有二物即有二本矣試觀一篇之內物有本  
末致知在格物物格而後知至一是皆以修身為本  
其本亂而末治者否矣此謂知本此謂知之至也無  
二物也無二本也無二知也二之則不是

問文成表章大學古本原只一篇不必分章不必補  
傳是矣旁註雖云歸重致知序則云大學之道誠意

而已矣似亦以前為經因提所謂誠其意者起頭故  
重誠意則又以下為傳其果然歟曰既信原是一篇  
而所謂又似起頭則二篇矣獨不思此謂知本此謂  
知之至也此謂二字得非承上文物有本末物格而  
後知至言之乎真信得物格知本為知之至矣則所  
謂誠其意者緊頂知本知至言也然則謂誠其意者  
毋自欺也非即上文欲誠其意者先致其知乎何也  
毋自欺者毋自欺其所獨知也致知即誠意實用功



處不過點出意之好惡使人于此實致其知而已矣  
故慎獨二字包誠意致知言也獨即此一物也安得  
以上文為經此為傳分作兩截耶問誠中形外在小  
人亦可謂之誠乎曰聖人指點誠偽之分莫有切于  
此者如閒居為不善見君子則揜不善而著其善此  
是偽處人之視己如見其肺肝然在小人却知得自  
家不善故這點真心都發露在外謂非誠之不可掩  
乎惟其誠中形外幾不可掩所以君子必慎其獨而

曾子平日謂其嚴如十目所視十手所指也

問近時提揭大學或致知或誠意或修身而子必欲依本文先在格物何也曰非子欲先之也依經文耳提修身者得其本矣不推其所先則不格乎物此本從何而出提誠意與致知則知所先矣而不知所在則物有不格此知何由而至故物格則知所先後知本知至而知止矣謂子有意先之則惡乎敢問誠意而下歷引詩書孔子之言皆所以廣誠意也

誠意為大學之要非歟曰格致誠正以修其身原只  
一事聖人于其中逐一細細剖析使人惟精惟一不  
可紊不可雜耳蓋上文此謂知本知至已包修正誠  
致在其內雖天下國家不過舉此以措之耳故雜引  
詩書不獨身心意知明明德親民止至善渾作一團  
如盛德至善民不能忘雖沒世不能忘而齊治均平  
莫不含蓄在內故總以知本收之宜專為誠意發也  
問康誥太甲堯典皆自明其明德也盤銘康誥周詩

得非釋親民乎何為謂親當作新者非也曰古文原是親字文成謂其不必改耳況日新承上文自明不已則日日新作新民以至新天命無所不用其極若不觀其會通惟拘執字義則日新新命可以謂之釋新民乎問止至善乃在仁敬孝慈信得非專言至善之散殊耶曰緝熙敬止見諸君臣父子與國人交統體散殊已兼之矣是故人倫明于上小民親于下此正是聖人明親之實學也豈教專空寂外人倫以求

至善者可同語哉

問修身緊承上文知本是矣此復舉身心並言之何歟曰形色天性也有是身即有是念懣恐懼好樂憂患之感只一著于有所便是心不正不正便是心不在一身之間凡視聽飲食亦不自知矣可見心中好惡之意或有發得是處謂之不誠亦不可惟稍有沾滯便非此心常寂常感之正體也此所以修身必先正心

身不專于形骸之末心不專于方寸之間忿懣恐懼  
好樂憂患總屬之心而見諸身者一落于有所則心  
即不得其正可見渾身都是心也如上天生物之心  
盎然太虛之內日月星辰風雨露雷何一非天故萬  
象森然無一能為太虛障礙者可見身不可有所固  
不專指方寸亦不專指形體而形神渾融為最難  
問修身齊家專自好惡言好惡果足以盡修齊之道  
乎曰人心所發不越好惡兩端公好惡則通之家國

天下而各當作好作惡則行之一身一家而不通如  
親愛賤惡畏敬哀矜傲惰乃人人所必有者有所且  
不得其正况之其所而僻焉可乎蓋人心公溥則明  
通偏邪則暗塞此所以好而不知其惡惡而不知其  
美也况溺愛不明貪得無厭此尤人之所同患者只  
此兩語凡有身家者可以諺而忽之哉

人以一身應接乎家國天下雖有尊卑老幼親疎遠  
邇之殊而此心之明德則無弗同者事親謂之孝事

君謂之忠事兄謂之弟事長謂之敬恤幼謂之慈使  
衆謂之仁雖曰其為父子兄弟足法而後民法之要  
在先慎乎德不慮而知不學而能一出于天性固有  
之良觀諸慈幼一端未有學養子而後嫁者可知也  
彼母之于子一體而分真誠惻怛皆其本性凡拊摩  
鞠育呼吸相關撫恤百端自中肯綮蓋由情真則機  
自通心誠固法自善也欲明明德于天下國家一體  
流貫心誠求之有不與民同好惡也哉故曰如保赤



子民之父母孰非其親親不容自己者哉所以興仁  
興讓興孝興弟殆猶赤子之慕慈母自有不容己者  
在矣噫真信此者始可與語明明德親民之學

問大學言止至善矣復言格物言知至矣復言知本  
言慎獨矣復言絜矩何歟曰大學之道一也明親必  
止乎至善者盡性也格物即至善之天則本即此物  
至善之本諸身獨即此物至善之原于一矩即此物  
至善四達不悖也問學貴自悟乃歷引詩書以證之

何歟曰學必師古此說命言學所自始也故歷引詩書見堯舜湯文以及衛武乃後學之模範也所以古之欲明明德于天下國家者必本于修身而先于正心誠意致知惟在格物都是如此豈後世單提直指不立文字者可倫哉

問中庸言教必原之天命大學言學只歸之至善何歟曰至善即是天命之性而止至善即是明明德之極處所以古人欲明明德于天下推其所先只在致

知格物正以物原統天下國家身心意知無不包無  
不貫也故下文證諸康誥太甲堯典湯銘自明不已  
則日新以至于新民新命無所不用其極這纔是至  
善所當止如君臣父子與人交必止乎仁敬孝慈信  
而何所不用其極哉後言峻命不易惟命不于常無  
非教人盡性以至于命也豈特顧諟天之明命為大  
學之真功耶

明親止

學與道非二也道以言其體學以言其功惟本體明  
徹則功夫庶乎不差而學固所以學此道也故大學  
必首揭學與道而申言之不徒曰明德必曰明明德  
不徒曰民必曰親民不徒曰至善必曰止至善本體  
工夫一齊呈露道之外無學矣否則學其所學非所  
以為大學道其所道豈大學之道哉然德本明也必  
欲明之何也是德也即人之性也即德性良知之通  
明是也在天為明命在人為明德吾惟因其本明者

而明之所以為學也方其未明或有氣拘欲蔽固必  
加夫磨礪之功及其既明恐復有拘蔽亦不忘夫緝  
熙之力未失者常保其明而不息既失者必復其明  
而後已此所以功夫即本體也然民而必欲親之何  
也是明德也本與天地萬物渾然同體本與天下國  
家之人一體而分者也即孩提知愛知敬之良原與  
斯人無所間隔是也吾惟即其本親者而親之而親  
民正所以明吾之明德耳雖曰吾于天下國家之人

未嘗無厚薄之等然天下一家中國一人非強合之也即如一身未嘗無手足腹心爪髮之殊而無故拔一髮傷一爪焉其心有不忍耳所以愛親者不敢惡于人敬親者不敢慢于人而無故斷一樹殺一獸非孝也人皆有不忍人之心而明明德者其能忍于一體之親乎然明明德親民而又止至善者何也至善者即明明德之本體也即孩提之愛親敬長原自不學而能不慮而知者是也止之者明明德親民一循

乎繼善成性之天則不容有一毫作為增損于其間  
即書之安汝止欽汝止也不學而能不慮而知固不  
以孩提而有所減不思而得不勉而中亦不以聖人  
而有所加詩云不識不知順帝之則上帝所以懷文  
王之明德者不在是哉奈何世之人語以聖人之不  
思不勉則畏之而不敢為語以孩提之不學不慮又  
忽之以為不足為此曷故哉不知大學之道云爾大  
人者不失赤子之心以言其學則學之大也以言其

道則道之大也何為捨大學而趨小道畏聖人而忽赤子哉然明親止固足以括大學矣又有八條目云者何也天下之道博之雖千萬語而不足約之則一言而有餘故總三語即繼之以知止何其約也析三語而謂格致誠正修身為明德齊治平為親民自所謂誠意以下為各條之傳亦無不可者何其博也况身心意知非明德之專于內也即所以為齊治均平之主宰家國天下非親民之專于外也即所以為致



誠正修之流行則是本末非二物終始非二事自明  
明德于天下直推至格物所謂合天下國家身心意  
知為一物也不信然哉一物有本末之分壹是皆以  
修身為本此謂知本此謂知之至也知至則知止矣  
是故明明德親民總歸之至善而約之以知止天下  
國家身心意知總歸之格物而約之以知本曾謂聖  
人有二學而學有二道哉本體功夫原不相離而學  
與道又豈有二乎哉

知止

宇宙間凡人與物莫不有歸宿之地而後能遂其生也否則食息起居行藏進退貿貿焉莫知所之求一日安定不可得矣此歸宿之地乃人與物之所必有者而學可知矣大學所謂知止指歸宿言也易艮止詩敬止書欽止安止皆此意也然則止之云者果歸寂之謂乎蓋於穆之體運而不息天之止也宥密之衷應而無方人之止也寂而未嘗不感感而未嘗不

寂顯密渾淪淵浩無際故易以動靜不失其時發明  
止之義也何可專以寂言耶然則以至善為歸宿果  
有方體可指歟人性本善至動而神至感而寂虛融  
恢廓本無內外顯微之間而一有方所非至善也然  
則知止云者果知識至此止息而復其無知之體歟  
蓋真知之體虛明洞涵固不可以分別是非為了徹  
亦不可以智識見聞為證解而性體瑩然灼見天則  
况知其所止原有聖訓物格知止且有明徵惟詳玩

大學本文其義具備何必巧為之說也是故邦畿千里惟民所止民各有所止曾謂學而無所止乎綿蠻黃鳥止於丘隅鳥尚知所止也曾謂人而莫之知乎仁敬孝慈信文王所以緝熙敬止也曾謂大學之止豈出倫理之外而別有虛寂所當歸宿者乎可見日用倫物皆性也至善之性即止也在己之心身意知而言謂之明德謂之仁敬孝慈信在天下國家而言謂之親民謂之為人君臣父子與人交所謂明明德

親民止至善即為君止仁為臣止敬為子止孝為父  
止慈與人交止信雖至善乃天理之渾融不可名狀  
而性善隨人倫以散見不得安排殆隨其萬感萬應  
各當天則而一真凝然無聚散無隱顯自爾安所止  
也所以大學之道雖只提止至善一語亦足矣必自  
明明德親民說來者豈無意而云然哉正恐離親民  
以明明德者斷情慾以證圓覺亦近似矣何與於君  
臣父子之倫離明德以新民者肅法制以致小康亦

其止念息機之談以為秘密寶藏肆言以傳會聖經  
陋亦甚矣胡不即大學上下全文以會通其立言之  
旨哉或曰人之性本善即人之知本良也是知即止  
至善矣何必知其所止而後得耶曰人性莫不有知  
也好智不好學者其失蕩性善莫不自止也日用不  
知者其失迷故其所止正復以自知開發有覺之  
靈即止乎至善之體內外瑩徹微顯昭融所謂致知  
在格物物格而後知至是也何必寂然觀空離出入

息以為止耶或又曰知一也既云知止又云知本何也曰知為此身之神靈身即此神之宅舍是良知具足于身中惟本諸身以求之則根苗著土自爾生意條達將來合抱參天此其本也故止即此身之止於善本即性善之本諸身止外無本本外無止一以貫之耳但言知止不言知本恐人以頓悟超脫為究竟終涉玄虛言知本不言知止恐人以檢飭制行為真修終歸強作于此會而通之學必以性善為歸宿也

不信然哉

格物

大學之道道本大而學亦大也在明明德親民止至善而約之以知止矣下文乃詳言之即揭此事物之本末終始使知所先後故自明明德於天下探本窮源曰致知在格物物格而後知至可見格物其大學之統括而道之所以為大乎物亦大無窮際而未易窺測者乎古今格物之論亦多矣苟能身體力行各



就所入以為功皆可謂之學特非大學之道也今之  
辯者不過指傳註與傳習錄中數語以相角耳謂在  
物之理有未窮故吾心之知有未盡是欲先外以及  
內也謂致吾心之良知於事事物物是欲先內以及  
外也知與物均之有內外之別也豈大學之旨與大  
學本旨謂何物有本末壹是皆以修身為本其本亂  
而末治者否矣此謂知本此謂知之至也凡言物與  
此不相契者非大學之所謂物矣然則格物之義云

何知修身為本其與知止之旨尚二之焉非知之至也知之至者真知身為物本而止乎是物天然之則安安於吾性至善之歸也嘗誦大雅蒸民之詩曰天生蒸民有物有則民之秉彜好是懿德孔子曰為此詩者其知道乎故有物必有則是物則也即天命之性渾然至善通天地徹古今無內外無人物合天下國家身心意知一物也天下之平國之治家之齊身之修心之正意之誠知之致與夫本末終始先後厚

薄皆是物自然不易之天則也明明德親民止至善者止于斯耳知止于斯故為君止仁為臣止敬為子止孝為父止慈與人交止信隨其所止各當其則而止至善也特本在乎身其為父子兄弟足法而絜矩於天下矣可見物格則知至知本則知至身即物之本而知止至善也但此學不明世之提格致者以修身為格致之條件而不知其本提知本者以格致為修身之事功而莫知所先不思知至一也若知本

格物判然兩途且與知止各一其旨是大學有二道  
作聖有二功矣二其功者可以語大學之道乎

知本圖

物知心意身心身家國天下

格物致知誠意正心脩身齊家治國平天下

物格知至意誠心正身脩家齊國治天下平

天地間物一而已矣吾人知一而已矣大學前云知  
止後云知本知果有二乎哉前云物有本末後云致  
知在格物物果有二乎哉前既云本末矣後云壹是  
皆以修身為本其本亂而末治者否矣本果有二乎  
哉前云物格而後知至後云此謂知本此謂知之至  
知至果有二乎哉可見一篇無二物也無二本也無  
二知也此所謂大學之道也何也天下國家身心意  
知一物也就一物之中而指其本則修身為本也知

修身為本斯為知本斯為知至即所謂知止即所謂  
物格而知至也大學之道豈不明白而易簡哉夫本  
不難知矣何知本之難其人也蓋自聖學不明世之  
人既無明明德於天下之欲欲則不肯先之以致知  
格物之功其欲也不過功利之私其知也不過聞見  
之知孰知是物也即所謂仁者人也即所謂形色天  
性也吾性之仁渾然萬物一體中國一人敦化川流  
顯微無間不離乎形色之人也心不正意不誠知不

致不可以語修身矣家不齊國不治天下不平可以  
語身之修哉故統一物言之雖有本末之分而其本  
則在乎身以身之所處不於家則於國不於國則於  
天下不能舍斯人而獨立也是以心意知之完具于  
身者非淪於無也實與家國天下之人相為貫徹家  
國天下之體備于身者非滯于有也實由心意知以  
為之經綸知修身為本者非徒解釋乎義理已也真  
知本者必能格物以致其知誠其意正其心精神凝



聚融結而眈眈其仁焉則誠諸中形諸外有諸己求諸人盛德至善民不能忘家于此乎齊國于此乎治天下于此乎平浩浩乎直以一身通于天地萬物上下同流明明德親民而止至善矣此所以總結曰自天子以至於庶人壹是皆以修身為本噫惟仁者為能與物為體大學一書即孔門求仁之方豈非修身固不足以立天下之大本非知本豈足以語聖人之大學

格物

天高地下萬物散殊雖一物不知乃其所耻俗學執而不化所以滯于有也萬物生于有有生于無吾有一物無頭尾背面名字異學蕩而無歸所以淪于無也蓋由見之偏而未會其全故有無分而二其物矣豈特二其物焉已哉且以虛實論知如致知則致為虛知為實知即明德也所謂不虛之良知是也如知止知本知所先後則止本先後為實知為虛所謂知

性知天是也不思知一也明德為體明明德止一明  
字即用如康誥明德是體克即用帝典峻德是體克  
明即用論語知之為知之不知為不知是知也何有  
于虛實體用之分哉可見體用原不相離德性之知  
即知覺之知知覺之知即德性之用猶之乎一人之  
身對祖父則稱為子若孫對子孫則稱為父若祖雖  
隨其異稱不因人之稱而改移其面目也不識其面  
目而止隨稱名以增擬議所以覲面不相識者多矣

蓋緣二其物故二其知則其分知與物而二之者又不待言也試以物言之萬物皆備於我今之談者必曰萬物之理皆備我之性談致知格物必曰致吾心之知窮在物之理不識聖賢著述何為吞一理字必待後人增之而後能明其說也易謂乾陽物坤陰物中庸謂不誠無物亦將加一理字而後明乎理一分殊言各有攸當也自物之本末言之天下國家身心意知物之分殊何如也自事之終始言之格致誠正

修齊治平事之分殊何如也然合天下國家身心意  
知而統之為一物合格致誠正修齊治平統之為一  
事而事之先惟在格物事物之理一為何如也且大  
學之道探本窮源惟在格物而身為物本一是皆以  
修身為本聖賢垂訓何其詳切簡明一至此哉諒哉  
物一而已矣無而未嘗無有而未嘗有一實而萬殊  
萬分而一本故中庸一言以盡天地之道曰其為物  
不貳則其生物不測易繫曰乾知大始坤作成物又

曰復以自知復小而辨於物合而觀之知果一乎否也物果一乎否也知之與物一乎否也真信其體之一則用自不容以不一皆不待辯而自明矣否則各執其見各是其說而不相通故人為萬物之靈苟昧格致而淪於無自以為靈明常惺惺矣何以使物各得其所也泥格物而滯于有自以為百物皆通矣何以通天地萬物為一體也然則欲通天地萬物為一體便物各得其所以充滿乎至善之分量者又可於

天生蒸民之物則而莫之省乎或曰傳註與傳習錄  
果不相通歟曰學者欲觀其會通須合二先生之書  
以會其全焉晦翁先生辯蘇黃門老子解有云道兵  
器之名雖異其實一物也故曰吾道一以貫之陽明  
先生詩云良知祇用安排得此物由來自渾成于此  
得意忘言二先生潛字默契蓋可想矣或曰格物之  
旨合內外虛實有無隱顯而一之然矣然必以脩身  
為本末他有所證歟曰哀公問何謂成身孔子對曰

不過乎物又曰仁人不過乎物孝子不過乎物是故  
仁人之事親也如事天孝子之事天也如事親是故  
孝子成身夫成身在不過乎物非孔子從心所欲不  
踰矩其孰能之雖然求物于散殊者其失也支離滯  
固物而不化人易識也異教則單提虛寂為宗云恍  
兮惚兮其中有物云有物先天地無形本寂寥祖其  
說者反援聖經無聲無臭寂然不動諸說以證之使  
高明超脫之士咸溺志于無物之歸俾大學之道愈



晦而塞格故不得不於大學格物詳辯之也噫乾知  
坤作不貳不測萬物皆備有物有則致知格物辯物  
自知天人性教一以貫之顧人之自信何如耳

修身為本

嘗讀程子全書謂人於外物奉身者事事要好只自  
家一身與心却不要好以此泛觀世間其人人之通  
病乎夫以一身處覆載中不啻滄溟一浮漚耳倏起  
倏滅于滄溟無增損也其自待之小甘為外物驅役

困苦豈上天厥付不均而分各有限制耶及讀大學  
謂自天子至庶人壹是皆以修身為本乃知吾人原  
合天下國家身心意知為一物就物之本末觀之乃  
知身為物本天子庶人分為崇卑身無大小真知修  
身為本者此謂知本此謂知之至也人可自小其身  
哉學有大小而人之小大因之耳然大學之道其旨  
意若未易窮詰而揭其要修身為本一語足以括之  
矣何也兩間萬類渾然一氣雖名象各別而物則本

同何獨于吾身而疑之所以天下國家即身之統體  
而大無外也心意知即身之蘊蓄而小無內也若止  
認塊然骨骸為吾身而不能致知格物以直窺天地  
萬物一本之原則砥礪名節整飭行檢亦有似于身  
之修矣內焉豐蔀屋以自蔽藏而德有不明外焉樹  
藩籬以分汝我而民有不親則天然至善之性吾自  
桎梏之而莫之覺矣豈大學修身為本之教哉惟此  
學不明故有從事于身以外者亦若可以治天下國

家矣然法制森羅事功炫赫非不足以表暴此身之設施而刻花鏤葉其如本實先撥何有從事于身以內者亦知自淨其心意知矣然止觀定慧了悟圓通非不足以解脫此身之拘縛祇亦拳局其本根以求活于盆盎堦砌間耳此所以學必求乎大學知止知本之道而後可以通天地萬物為一身合天下國家為一體也且形色天性原無精粗無內外也學大學者果知修身為本則知吾身即天地也原自為物不

貳原自生物不測原自一物不著原自萬物皆備知  
即根本之通明其于家國天下洞然無疑而此身常  
著察焉致知者致此也意即根本之發生其于家國  
天下盎然同春而此身常活潑焉誠意者誠此也心  
即根本之真宰其于家國天下廓然無碍而此身常  
清寧焉正心者正此也凡視聽言動之間喜怒哀樂  
之際大而綱常倫理微而食息起居朝乾夕惕毋自  
欺其至善之物則焉雖萬感俱寂此身非無事也天

下國家之經綸已于此乎藏諸密而靜非無也雖萬  
感紛紜此身非始有事也心意知之所主宰隨其酬  
酢澄然不撓而動非有也為君止仁為臣止敬為子  
止孝為父止慈與人交止信惟其身之所接而物則  
周流我無所與故己欲立而立人已欲達而達人安  
人安百姓胥此乎存焉信乎格致誠正齊治均平只  
修身為本一語足以括之矣或曰易復之初九不遠  
之復以修身也言內也家人上九威如之吉及身之

謂也言外也大學正心誠意致知不專於內乎曰物無內外故身心皆合內外言也何也人知忿懣恐懼好樂憂患存諸心也何為原又有所只自身言人知視聽飲食形諸身也何為不見不聞不知味皆由於心不在耶此所以心不正則身不修身不修則家不齊國不治天下不平如好人之所惡惡人之所好是謂拂人之性災及其身矣孰謂身心可專以內外分言之哉或曰如子之意則身有所忿懣不當改身為



心歟曰觀人之忿懣者必有怒容恐懼者必有戰色  
好樂者必有笑顏憂患者必有愁態則其所謂有所  
果屬之心而非身乎不然何掩不善而著善者乃肺  
肝之如見也此所以身心相貫人已相通身不行道  
則不行于妻子而其身一正天下歸之矣修身為天  
下國家之本也又何待他釋哉或又曰子前取證成  
身不過在物則本即物有本末之本矣有謂此本不  
對末言者非歟曰天之生物也使之一本正言無二



本也況本亂則末不治聖經已有明訓何必取證天  
上天下惟我獨尊必欲脫離四大之幻身求所謂法  
身化身報身而身外有身始為真知本來面目哉噫  
不求明格物而及竊禪宗止義以深言其本也抑末  
矣

毋自欺

昔嘗誦大學誠意章得毋自欺語不覺豁然醒欣然  
喜此中若有所持循追惟陽明先生曰大學之道誠

意而已矣信哉斯言也誠意工夫只此一語足以蔽之每謂此三字符終身誦之可也蓋自誠明謂之性自明誠謂之教非分兩等人言也天之生人也其渾然樸實處明自生焉此天命之性也聖人之教人也由了然明白處而誠斯存焉此修道之教也所以誠則明明則誠非判然不相合者大學曰欲誠其意者先致其知而由教以入也得非自誠明哉夫自欲明明德於天下追其功之所先至致知焉止矣致知在

格物則無先後之分矣可見致知即誠意之實功也  
即古本觀之此謂知本此謂知之至也所謂誠其意  
毋自欺也既云知之至也稍涉自欺則知不致矣意  
何自而誠耶是格物致知誠意只毋自欺足以括之  
若曰如之何以致其意又如之何以誠其意明誠各  
一其功也奚其可難者曰溫公語劉元城終身所行  
只在乎誠而行之自不妄語始元城力行七年而後  
成此非無自欺者乎不知用功真切如元城亦可以

為難矣謂此即大學毋自欺之功則未也何也元城  
原非知本之學也若謂元城為能誠焉則趙清獻書  
之所為夜必焚香告天司馬溫公平生所為無一不  
可對人言者皆至誠之聖人矣吳草廬何為乃云未  
免行不著習不察也惟其原未知本原不可以語知  
之至則不可以語聖之誠也明矣蓋自天子至於庶  
人壹是皆以修身為本真知修身為本者必真知天  
下國家身心意知為一物而反之此身凡立本之道

悉洞徹不疑即前云知止即孟子云知性知天此所以為知之至也斯人也一毫不敢自欺而知止至善矣又何意之不誠哉且欺之云者非徒欺瞞己也即世云欺侮是也悍僕之欺主強臣之欺君原不知君位主翁之至尊故敢恣其凌侮無所顧忌而人之自欺其天君主宰殆有甚焉信乎毋自欺其知本之知則知至意誠管是矣然人每自欺其知豈有他哉好惡偏而邪暗塞也夫好惡乃人心天機所本有者非

去思絕念不起意之謂也如惡惡臭無作惡焉如好  
好色無作好焉此之謂自謙而能慎其獨知矣雖好  
惡萬有不齊獨知常止于至善雖謂之無好無惡可  
也故曰欲誠其意者先致其知知至而後意識也可  
見好好惡惡知之原于天性者不待見聞探索而知  
無一息之不明如惡惡臭好好色意之發于天機者  
無所將迎畱滯而意無一毫之不誠惟時時毋自欺  
則心身家國天下一以貫之何也人未有內不欺已

而外欺人者也故意發于身心而好惡不着于有所  
我自知也我自不欺此物則也斯心正身修而德明  
于身心矣意動于身家而好惡不至于少僻我自  
知也我自不欺此物則也斯身修家齊而明德于身家  
矣意動于家國而本恕心以好惡我自知也我自不  
欺此物則也斯家齊國治而德明于家國矣意動于  
天下而同民心以好惡我自知也我自不欺此物則  
也斯國治天下平而明德于天下矣是明明德于天

下而功惟在乎毋自欺匪特民不能忘且沒世不能  
忘而能民無訟焉則合家國天下之民皆毋自欺矣  
孰謂毋自欺非大學之要訣乎要之章首欲明明德  
于天下而其始在於格物物一格而其終至于天下  
平末章以絜矩為平天下之道豈格物之外別有絜  
矩云乎哉絜矩即格物之義毋自欺即格物絜矩之  
實也一毋自欺而格致誠正修齊治平無餘蘊焉何  
其簡而易也但毋自欺三字以之語市井販夫莫不



警醒若論其功夫雖久於問學者未必能實踐也惡  
可以其近易而忽諸

孝弟慈

天下國家本諸身學誠大矣究其本旨身之所以通  
乎家國天下者不出孝弟慈也學者昧之反求至善  
于虛寂而不求止于仁敬孝慈信焉大學之道安在  
哉嘗與同志論此因記其畧有謂古之學者為己志  
學之初即欲明明德于天下不幾于為人乎蓋己非

軀殼之謂也仁者人也形色天性也天性之仁本合  
天地萬物為一體而非強合之也家乃身之積也國  
乃家之積也天下國之積也其初也蓋焉太虛吾身  
與天地萬物皆一體而分混乎其無間也是家國天  
下莫非己也觀己之好惡出于太虛未嘗不通之人  
人之好惡出于太虛亦未嘗不通之己可見也所以  
仁者與物同體己欲立而立人已欲達而達人仁本  
如是也誠者非自成己而已也所以成物也性之德

也性本如是也欲全天性之仁而必欲明明德于天下國家雖曰初學之發心也抑知學必如此而後可以為大學哉又謂君子之於物也愛之而弗仁於民也仁之而弗親大學明明德即欲親民不幾于仁愛親之無辯矣乎蓋親非無等殺之謂也近觀一身凡腹心爪髮莫不愛也未嘗無內外輕重之別遠觀六合凡天下國家莫非親也又豈無疏戚厚薄之殊但人之常情惟知有己而已矣隔形骸而分汝我樹藩

離而異比鄰且將視天親猶途人不明亦甚矣記曰  
凡生天地之間者血氣之屬莫不有知有知之屬莫  
不知愛其類每誦至此未嘗不掩卷嘆息而悲人之  
不鳥獸燕雀若也此所以大學之道在明明德在親  
民家國天下悉在其民胞物與中正以擴充不忍人  
之量而復還天性之仁體耳壹是皆以修身為本尚  
何二本之患哉是故欲明明德于天下者即欲仁也  
親民正以明明德者擴吾性一體之仁日見諸家國

天下隨所應接之實事也。觀孩提知愛知敬一本諸不學不慮之良而天性之仁茲可見矣。所以齊家治國平天下若有所不同。然一則曰孝者所以事君也。弟者所以事長也。慈者所以使衆也。一則曰上老老而民興孝。上長長而民興弟。上恤孤而民不倍。喫緊又只在修身為本。其為父子兄弟足法而民法之。由此民不能忘。以至沒世不能忘。要皆取諸身之孝弟慈而足矣。可見天性之仁一也。隨所接而異乎。孝弟慈

之名焉惟此心真誠惻怛融液貫通始于親長達于閭里族黨以及四海九州施有漸次心無間隔故孝弟慈即明德也止孝止弟止慈即止至善也身法一端人極攸立民皆興孝興弟不倍焉即所謂親民所謂明明德於天下國家即所謂天地萬物為一體也大學之道何簡易如之噫有天地萬物一體之志願斯有天地萬物一體之學術然非真知天地萬物本吾一體而其要只在孝弟慈焉安能志此學哉是故

信此者斯可以信孔子之志學斯可以信孔子從心所欲不踰矩

絜矩

物有體必有用也。泥定體者其用有限體雖存而無形故隨感而用不窮也。夫人孰不曰天下之用萬有不齊我之所以待其感而應之者以有定體故也。體不先定何以待其不測之用哉。然隨其所感而體不易謂之定焉。何也。執我之定體以應天下事物則膠

滯而不通者多矣。蓋觀大匠之運矩，乎矩所以為方之器，無方之形也。無方之形，而天下之方皆從此出。凡欲為方者，運此矩以度之，或斲或削，是尋是尺，而後能成其器之方焉。否則天下之器，小大厚薄，不可勝計。方亦如之。欲先執一定之方，以強其同，也得乎哉。大學曰：君子有絜矩之道。至論矩之所以絜，則不外乎民之所好好之，民之所惡惡之。同民心以為好，惡而我無好惡于其間，此天下所以截然方正一歸。



于平也以天下之大平之若此易易焉者平以此心  
之矩耳非執此心之矩強天下之我從故又以能好  
能惡歸之仁人也可見是心也將以為棼然其靡定  
乎炯然在中萬化攸基應感紛紜確乎不拔故一人  
之公是一家是之一國是之天下莫不以為是也一  
人之公非一家非之一國非之天下莫不以為非也  
謂之靡定不可也將以為一定而不易乎神明周流  
圓虛不測隨感而應惟變所適故唐虞揖讓不可為

商周之征誅臯夔襄贊不可為關比之直諫執為一定亦不可也何也大匠有定規而矩無定方也君子之心有定理而理無定好惡也此心之矩在絜之者何如耳能絜則以我之心同天下人之心凡用人理財莫不與人同其好惡故得衆得國得天命焉不絜則強天下人之心以同乎我好惡拂人之性斯蓄及其身矣毫釐千里幾之不可不慎也如此故求人非人藏身不恕則所令反其所好非所以絜齊治之矩

也親愛賤惡畏敬哀矜教惰之其所而僻焉非所以  
絜修齊之矩也忿懣恐懼好樂憂患一或有所則矩  
且失其所以為矩矣故約之至于致知誠意惟在知  
本毋自欺其好惡而常自慊焉非慎獨之君子其孰  
能之則是矩也即前之所謂獨也所謂物也絜矩則  
慎獨格物言殊而義則一也是故孔子自十五志學  
至七十從心所欲不踰矩老安少懷綏來動和無非  
與民同好惡而明明德于天下云耳故曰規矩方圓

之至聖人人倫之至也雖然矩所以為方也孟子謂孔子聖之時時則圓神不滯無方無體矩與時不相悖乎蓋惟其不踰矩此所為聖之時而與時偕行此矩之所以無往不絜也若世所謂矩特執方以絕俗而舉足便有礙耳豈無定方之矩乎世所謂時不免毀方從俗圓滑輒熟以投衆好耳豈不踰矩之時乎觀匠之為圓必自方始蓋可見也况志大學之道其于格物絜矩之義可弗究心乎哉



圖書編卷十四